

刑考

詳讞
恤刑

文獻備考

東國文獻備考卷之一百四十五

校正

刑考六

詳讞

補新羅婆娑王即位慮獄囚非二罪悉原之

奈解王三年令獄之疑者會都堂讞之

補六年三月大旱慮囚原輕罪

補十五年夏旱慮囚原輕罪

補三十一年秋大旱慮囚原輕罪

補味鄒王七年自春至夏大雨會群臣於南堂問政

刑得失

補十九年四月旱慮囚

儒禮王元年令明習律令者決疑獄

補訖解王時因夏亢旱王親慮囚

補訥祗王四年秋民飢慮囚

補炤智王四年四月久雨慮囚

智證王五年刪定律令仍令評讞

真平王二年令中外當死者定按以聞王親閱斷之

補七年旱王御南堂親錄囚

文武王九年令曰囹圄之中不被泣辜之恩枷鎖之

苦未蒙更新之澤言念此事寢食未安犯五逆者死
已下今見囚禁者罪無大小悉皆明覈以示慎刑政
之意

百濟多婁王二年飭諸縣死罪不得便決悉移京獄
按覈事盡然後取奏裁令死罪者五奏以決

補義慈王二年二月王巡撫州郡慮囚

補高麗靖宗二年制曰朕方在夏服屢致變恠欲施
好生之德以示恤民之心其犯斬絞二罪者除刑配
無人島雖犯二罪情可矜者配有人島於是免死者
百十六人

○文宗元年刑部覆奏死刑王曰人命至重死者不可再生寡人每聽死囚必待三覆尚慮失其情案倘有冤枉欲訴無路飲恨吞聲可不痛哉其審慎之

○補二年制犯罪流配人有老親權留侍養親沒還配

○補十二年制曰水旱不調災變屢見是皆刑政所失

怨憤所招若欲仰答天譴俯慰人望必宥罪寬刑兩京文武南班貢吏有犯當降黜者及諸州府郡鎮長吏將校酌其輕重依舊叙用公徒私杖以下原之

十五年制曰刑政王化所先峻則民殘寬則民慢刑得其中則陰陽和而風雨愼法失其宜則怨氣積而

災眚作虐臣酷吏世常有之朕邇追訓誥篤慎典刑
刑部貢吏精擇委任自今定制必脩三貢訊鞫囚徒
補肅宗元年詔曰舊制凡官吏決訟小事五日中事
十日大事二十日徒罪以上獄按三十日已有定限
其令內外所司申明舉行

補忠烈王五年王以田民之訟積年未決命左司議
權胆將軍崔有渰及監察典法司推決無滯冬因
星變慮囚判觀候署事伍允孚謂典法摠郎朴仁澍
曰典法決訟何多留滯耶仁澍曰內教判旨如雨安
得不滯允孚以告王王使語仁澍曰我非以偏聽父

右其人凡有告者欲令有司早為剖決故命之耳豈為私耶仁澍對曰若無判旨內教而臣挾私決訟則罪當死矣

○補二十七年元中書省移文曰本國刑罰不中因人誣告不問證左只憑元告三問不招無問輕重流配海島遇赦不還刑獄枉濫觀此一事餘皆可槩見

○補恭愍王元年命典法司開城府選軍都官凡所決訟五日一啓

○補六年憲府上疏曰凡大辟必三覆奏君臣同議斷決者先王成憲而今中外斷死罪輒擅決不以聞請

自今中外大辟所在官吏具報都堂施行從之

令曰人命至重絕不復續聞獄官多不詳刑以致冤
死自今有枉刑者都評議司御史臺申聞糾理

恭讓王元年令立春至立秋停死刑在京五覆啓在
外三覆啓許斷罪事干軍機及反逆不在此限

補本朝太宗十一年冬雷木稼上曰古之人君若有
天災地恠必廣詢民瘼遂分遣李之剛等于諸道
咨詢民瘼審理冤獄謂曰在京掌刑官吏非一猶有誤
斷者况州郡乎昔趙大臨之獄聞獄官急於大臨緩
於仁海乃遣黃喜監問果得其寀仁海伏誅若不更

覆必誤斷矣自是益知獄訟之不可不剛之剛等陞
辭上曰在位十餘年間天災地恠無歲無之予每反
躬自責然民生疾苦安能洞見爾等其徃敬之

補左散騎朴嘗上疏曰巡軍之職掌巡綽捕禁兼
治刑獄者也徃徃以不學之輩僥倖冒側訊以難
對之言施以慘酷之刑殘虐無辜以傷和氣願自
今擇朝士之有兇度學識者以差其任而法外之
刑亦令嚴禁以慎刑獄也從之

世宗元年禮曹判書許稠奏曰中國之法有可法者
有不可法者金漸曰臣見皇帝親問罪囚詳加審覆

殿下效之許稠曰

原本誤作上教今釐改

不然若人主親決罪

囚無問大小則將焉用法司上下覆難務宜詳讞

八年

原本作三年今釐改

命趙洵等中道付處右議政趙洵等

受人相訟奴婢暗為致力得決憲府按覈得情洵等並付處上仍教憲府曰予聞迷劣之人相訟奴婢聽訟官吏夤緣請托以致冤抑者或有之今此之事予甚嘉之

補

義禁府啓官人盜御庫財律當斬上從之知司諫

高若海曰殺人不可輕古之聖人雖左右諸大夫國人皆曰可殺必審其可殺而後殺之且凡死囚法必

三覆今宮人盜財帛下義禁府斬之不使覆奏後世
中主以一時私怒藉此為口實便下詔獄輕行誅戮
非所以示法也上嘉納之命立義禁府三覆之法

三年

原本作二年今釐改

教曰凡犯罪必三覆啓者以重人命

刑曹於二覆以後更不考元券有違立命之意自今
每啓須憑元券以聞

十年刑曹判書徐選之弟達殺新昌吏表藝平推官
等分首從以達之奴為首且聽其和事覺上命推前
後推官忠清道觀察使並下金吾擬罪有差

補

世祖元年領議政鄭麟趾以強盜充斥請令義禁

府漢城府刑曹及外方守令倣古鉅笥之法許人匿
名投告且請強盜當死者勿令三覆隨即處死上曰
投告之門一開則挾怨懷私陰搆禍亂者接跡而起
決不可行也且三覆之法所以戒生道也待時之法
所以順天時也皆先王成憲美意唐時必令五覆本
朝降為三覆而初覆則常致謹慎再三則漸至忽略
况不念愛禮存羊之意輕減其數乎

補教曰人於五倫父子為重今有父母老而徙兩界
者一離故鄉終不得養其父母其哀悶至矣國家已
有親老侍丁之法獨於徙邊者而不恤可乎以故徙

邊之人父母年過七十者許令歸養然以獨身歸養則妻子無依挈家歸養則終養之後哀怨如前如何而可乎且此非古典乃世宗一時權宜之法也有親老者歸養之後欲勿復徙邊其令政府議啓

補命自今京中則月季外方則節季錄用刑之數以聞

補教曰獄囚三限之法雖累申明官吏視為文具哉因事故或托辭證不明牽連歲月且有情理曖昧終涉疑獄而拘於文法未卽決遣令諸道觀察使遣首領官于諸邑辦理滯囚其曖昧冤枉者及答以下囚

人並皆放免具辭以聞

補三年飭京外罪囚毋得淹滯以致殞命

補咸安人崔玉山以弑父獄本道推刻以啓上見獄辭不具備語左右曰弑逆人倫之大變罪之必當其可小或誣枉反傷名教遣副知承文院事金國光更鞠果得寃狀上驚曰若非金國光幾殺無辜矣

補七年教曰凡決事官公事分為大中小三等限日畢決若不得已則具由以啓已有成法近來司憲府義禁府刑曹漢城府官吏雖已過限一不以聞甚不可也其速分等以啓

八年上御思政殿決囚反覆辨問死囚仍謂世子曰
刑獄至重人命所關人君所當軫念者若官吏不察
情實捏合成獄曰此人可殺人主漫不知察亦曰可
殺則彼亦予之赤子於君父之道何如人主每遇獄
事當求可生之道世宗常謂文宗曰刑獄雖答罪不
可容易處決予未嘗敢忘汝其體此意也

補 睿宗元年命大辟覆奏時承政院詳察以啓

補 經國大典 決獄大事死罪三十日中事徒流二十日

小事

杖答

十日為限

從文券齊到

日始計

辭證在他處事須

叅究者隨地遠近除往還日數亦於限內決訖若牽

連不得已過限者具由啓聞凡誤決如父子嫡妾良
賤分揀等項情理迫切事卽許訴他司其餘決折堂
上官及房掌通代後更訴過二年者勿聽○死罪枷
杻鎖足流以下枷杻杖枷議親功臣及堂上官士族
婦女犯死罪鎖項堂下官庶人婦女鎖項足杖則鎖
項凡挺拿押行時堂上官士族婦女犯死罪則鎖項
餘外否年七十以上十五以下非強盜殺人勿囚犯
盜者免刺○功臣議親拷訊啓請時並錄功臣議親
以啓○節度使所管人軍務外所犯杖以上移文觀
察使推斷○文武官及內侍府有蔭子孫生貢進士

犯十惡奸盜非法殺人枉法受贓外笞杖並收贖公
罪徒私罪杖一百以上決杖○議親有服之女雖出
嫁請罪時依本服論○凡喪前所犯徒流以下之罪
發於喪後者除十惡外收贖自願受罪者百日後決
罰○獄囚情涉疑似者具由取旨○京外死罪本曹
報議政府詳覆死罪三覆啓外則觀察使定差使員
同其邑守令推問又定差使二員考覆又親問乃啓
○罪人罪名始囚日月拷訊及決罪數各其司每十
日錄啓外則節季啓○所寬抑者京則呈主掌官外
則呈觀察使猶有寬抑告司憲府又有寬抑則擊申

聞鼓鼓在義禁府當直廳凡上言當直員考司憲府

退狀受啓義禁府司憲府所理不考退狀

凡上言啓下五日內

回啓如或過限具不
即回啓辭緣以啓

○外方詞訟務停後

春分

務停

前

秋分

除十惡奸盜殺人捉獲付官逃奴婢仍役據

奪奴婢等一應關係風俗侵損於人外雜訟並勿聽

理

○補成宗六年教曰天以陰陽五行化生萬物春夏以

長養之秋冬以肅殺之聖人則焉德禮以導民刑政

以示懲刑豈聖人之得已哉然辟以止辟刑期無刑

亦無非所以勸民善而全民性也惟我太祖革高麗

煩苛之政太宗丕承以致刑措世宗好生之德高出
百王嘗下恤刑之教歷採古今刑獄之可鑑可戒者
十餘條丁寧訓諭欲使司刑者體而究之遵而行之
世宗之心卽大舜之欽恤也文宗申明三限之法以
雪滯獄之寃蓋大限三十日中限二十日小限十日
叅考大典則唐之立限寬於宋我朝立限又寬於唐
斯乃世廟之盛意文廟成之則明慎刑罰是我祖宗
家法予以眇末叨襲丕緒夙夜兢惕惟恐刑辟不中
傷和致寃比觀讞獄官吏所失非一苛暴深刻者常
失於羅織昏迷庸暗者常失於淹滯喜羅織者深文

峻法嚴加拷訊援引傳會一切增飾無辜之人橫罹
斧鑕喜淹滯者捕係不決動隔炎涼桎梏加軀饑寒
砭肌悲號疾病瘦死奸獄豈不痛哉其以此意曉諭
中外

補鈴平君尹繼謙為刑曹判書時年三十一聽斷
明允囹圄一空時獄訟多滯朝廷設斷訟都監抄
選一時明允宰相為堂上繼謙首膺是選積年申
訴剖決無遺人皆決之

補中宗五年正月命每月一日十一日二十一日錄
啓囚簿著為式

二十五年右賢成

官銜
恐誤

李彥迪啓聖人之政法乎天

道春生秋殺付之無心不容一毫私意而好生之心則未嘗不行乎其中人有犯罪按法應誅而不可赦亦必近咨侍從廣議朝廷而兼采國人公論者蓋欲閱實原情而求生道也頃者臺諫請誅陰陽具備之人以除不祥聖教乃曰禽獸亦不可輕殺況於人類乎授之絕域可也大哉王言真天地父母之為量也世之人主或因一時之怒不暇按法公議原情定罪而輕殺人多矣如唐太宗之斬張蘊古隋文帝六月殺人之類是也其為逆天害仁甚矣上嘉納之

宣祖八年載寧郡有奴殺主之變而檢屍差誤不能
得其致命之由鞫於禁府三省朴淳為委官獄久不
成知義禁洪曇力辨其寃而亦無明驗淳曰綱常大
獄豈可輕釋曇語侵淳必欲釋之淳不能折乃請改
檢其屍檢屍守令承望禁府風旨或不錄致死之由
或錄以以病致死紛紜不一淳乃請廣收迂議右議
政盧守慎力言不可輕釋上曰屍帳相違斷獄無據
命罷郡守

柳成龍疏曰我國士大夫既不讀律辨獄折訟多
不得平至檢驗關係至重而為守令者每當殺獄

不欲親自監檢按摩硬軟多委下吏之手實因差之毫釐人命決於俄頃甚至有因緣鬻獄之弊獄情之疑難枉直之不決摠由於檢驗之不審請申飭外邑凡有殺死詳加檢覆焉從之

十四年下朴民獻于義禁府治以受賕之罪朴民獻為江原監司時橫城縣民存伊弑其母被人告之獄既成方受刑訊民獻所幸妓受存伊重賂潛請民獻勿治民獻托以親問拿致營獄遽放之民情憤鬱至是事發更鞠存伊于禁府三省交坐辭訂皆歸一存伊不服杖斃兩司啓請拿鞠民獻治以受賕故縱之

罪

二十二年下教評讞時有富人尹百源者身死其妾
子等呈訴嫡女某之妻行毒弑之遂設廳鞫之上谷
委官之啓曰尹氏生自深閨一朝驅迫官府與獄吏
相對供辭於亂杖之下魂飛魄散其不殞絕幸矣招
辭豈有不錯之理乎若執此為之辭以為殺父而直
加酷刑恐有意外之至寃矣大抵決獄自古難事而
天下之罪又無大於弑其父者當先參其情理以致
其詳審之道也夫長在龍山臨年垂死之父何可親
行毒弑於衆妾環列與客相對之時乎此果近於情

理乎設或梟獍之人陰懷難測之意其術必不若是之疎也百源平日致疑於其女之置毒女家所送之物不食云信如斯言其父視其女來到則惟恐揮斥之不逮又安有使之接跡於其家自取其毒之理乎百源有諸妾子而嫡妻只有此女今告而指之者只出於厥輩之口此果人心可服處乎若平日不順之故而指為弑逆則天下不順之子多矣昔許世子止不嘗藥春秋書弑先儒謂之誅意之法而後儒以為非仲尼之意也當時之不嘗藥者多矣獨以弑逆加之於止非聖人大中至正之道豈可以不順之故而

加極惡之罪乎諺曰烏飛梨落仆地據鬚此言雖俚
可以理諭者昔柳淵以弑兄被鞫承服及其結案叩
膺稱寃妄官沈通源以尾礫擊其口當時孰不以為
快也犴獄間事何以盡測哉抑無乃奴婢中凶惡者
因嫌怨乘其來到置毒而嫁禍於尹耶大抵三妾在
百源之測不可不問也並加刑訊

補鄭汝立之獄上親臨鞫囚李恒福以問事即明
敏稱旨上每名恒福使傳說同僚拱手不敢望每
大臣議讞恒福周旋其間務從平反全活甚多後
於講筵上召恒福使道問事時事而亟稱高才

三十一年命議官人杖殺不為對驗

李恒福議曰謹按無冤錄檢屍條對衆定驗得云
而不言管下則不對又大典濫刑條官吏濫刑因
而致死者杖一百永不叙用云而不言為官者對
檢故凡人則依無冤錄對檢償命官人杖殺人則
依大典只不叙用乃是流來規例而實未知官人
不對檢有何所據而然也近來或對或否前後異
規隨時無定左為未穩今可考而為證者只有此
兩書皆無定文以意推之所以對檢者殺人者死
故重其為事令本人與衆叅驗而聲其罪也所以

不對者杖殺管下罪不至死故事體差輕本人承
服則論以殺之而斷其罪也設法本意若果如此
則官人杖殺人者雖依流例不為對驗恐亦無害
也伏惟上裁命依議

補仁祖改玉初金長生遺勲宰書曰賊臣當國斲
滅天常罪實滔天然按獄之體不可無差等之別
五刑五流輕重殊科持衡審權務得其中毋或為
乘快濫觴之弊可也或以五王之遺禍為戒此非
君子之言也王者用法惟視情罪之如何寧容私
意哉

補內需別提梁德允有罪當刑命除刑決杖副提學鄭經世劄曰刑之輕重視罪之淺深如權衡稱物得其平而止而其柄在有司雖人君不得容私意於其間而有所指揮使輕者重而重者輕也禮曰君者立於無過之地者也惟如此然後可以正人也殿下何有於一肆而不肯自立於無過之地乎

補孝宗元年領議政李敬輿劄曰伏聞金吾大理囚繫滿獄或因國家多事或因遠道查覈有罪未服無辜未伸淹延時月不蔽無期不但諸囚向隅

呼冤各其子弟親戚憂遑奔走以此許之愁歎者
凡幾家幾人加以天威久襲人自不畏矣因暗行
狀啓被繫者尤多自前暗行之規文書現捉者從
輕重或刑或配風聞舉劾者罪名雖重不過罷削
蓋以文書有徵而風聞無跡故也至於以特遣之
臣親自廉訪者還問於藩臬之臣上下其罪豈特
有傷事體實是養成欺詐元非祖宗朝故事臣意
一從御史現捉文書從輕重依律科斷不現於文
書涉於風聞者小則罷免大則削官無使符同欺
誣循情查報之弊叅錯於其間則淑問之下無眩

亂之患而一筆勾斷囹圄幾空矣

補四年又劄曰古者要囚服念不過四五日而今則雖偶掛文綱亦必縲繫逾時折獄之體豈宜淹滯若此掌刑之官不無他事專意治獄讞議速令疏決毋使滯獄卽吏之選亦釋經術平易之士使得佐於奏當如古廷史之制則不無少裨矣

補又曰殿下志在振肅綱綱思變世道內蓄仁心外示嚴法不任三尺務從重科勘覈之罪或至徒配人多稱寬威久而褻效蔑弊生臣愚以為大小讞讞一從奏當勿為太拘於規例內外要囚繫繫

者亦令所司及本道從速斷決而刑人於市必待秋令乃王者順天之道而召和之一助自今非逆獄綱常等罪必於霜露之節明行天討豈非王政之政一端也

補六年又以領府事劄曰帝王之治德政為本而刑罰次之刑雖得中不如圉空如或過差致灾尤捷方今朝臣貶逐竄黜者非有四凶之罪也因事編配者非盡怙終之輩而離親戚棄墳墓吊影窮荒寄跡他鄉足以傷天地之和致水旱之灾寧不有累於仁覆之天哉然罪在罔赦罰用正律則舉

法懲惡亦是天討寧可以區區小仁有所曲貸但王者勅刑當順天則左右皆曰可罪卿大夫皆曰可罪國人皆曰可罪然後罪之未知此輩左右卿大夫國人皆謂之可罪乎若不至得罪於國人而獨出於乾斷則恐非適輕適重勿次有倫之道也

(補)顯宗三年李敏迪劄曰今以數易之刑官責以易眩之文案顛倒出八只憑於猾吏之手是非苑生遽斷於刀筆之間加以請托公行幻弄多端小大之獄皆失其平民安得不怨又安所赴愬今若擇任刑官久於其職卽署之任尤宜慎簡皆以二

暮為限勿許他遷使之服念丕蔽無逾旬時一遵
推斷日限且外方滯獄亦有甚焉稍係重獄動經
數年亦令監司守令一切䟽決時遣京官巡視庶
獄若有如前久滯斷以重科則欽恤之仁庶被內
外矣

補十二年有守闕軍士不勝寒凍取空殿數幅布
帳以禦寒法當斬左議政鄭致和以為外方愚民
不識法禁其情可恕反覆奏讞特命減死論

補李景奭嘗以實錄摠裁官言于諸郎廳曰他
日或有鞠廳則諸君必為問事郎吾試以故事

告之罪人所引者有姓名相同而居處地位不同姑不知其所引之為何人如所引者張三而一居東一居西則必先問張三居在何地身係何役所業何事面貌何如使罪人明白指告蓋罪人身在不測之地求生於必死之中初以東居張三告之而治獄者誤認為西居張三輕發言端則罪人徃徃舍其初告之人反以治獄者所舉之人掇稱以對一言錯了苑生係焉且首座大臣搆出問目則問卽只以問目中所載之語發問罪人不可換八已見有所增行諸君不

忠老夫之言鄭相太和聞之曰某公之言真格
言云

補李慶徽嘗與金佐明語及鞫獄事慶徽曰我
國鞫獄規例特嚴不無冤死者若改而殘之則
日後所活奚但王賀之萬人也善文者平居無
事之時結撰疏章數日思索屢易草藁而猶不
能盡意況於罪人心魂爽亂神識昏迷而促令
納供急於星火搜稱甲乙錯認東西勢所然也
而取其惟惴中迷亂之供指為違端啓請刑訊
施刑之後則雖有追陳暴冤之言謂非問目中

所問使不敢開口必準杖而止而謂以與前供
少無加減又為請刑一次二次至於累十次而
猶然故一入鞫獄無得生出者按獄者非不知
其弊而拘於獄體因循不改有罪者固無足惜
若橫罹者則其寃何如自今定式雖有元惡大
憝一見而即知為正犯者如有追陳之語則收
錄其語刑訊時雖非承款之言凡有所陳又皆
書錄啓達則聖鑑所照必燭其情罪之虛實而
無罪者可蒙其哀矜之典矣佐明日我先考文
貞公亦嘗有是言矣鄭相致和聞之歎曰李公

此一言亦足為賢宰相

肅宗甲寅廣州民李尚信嘗習射於家後庭塲其母適坐於籬內尚信彎弓將發之際手決脫落矢離弦橫發正中其母腰背間三日而斃歟葬後尚信詣官自告請被戮死本府推覈得實尚信之父亦以為尚信遭變之後累次自縊僅得救解使之受罪官家事下刑曹議大臣大臣議曰李尚信之母致死既由於尚信射矢之誤中則在尚信之道不可一日自容於覆載之間宜卽自決而雖曰當初自縊之時為其父所救解至今不死亦可見頑蠢無狀子孫於父母過

失殺者杖一百流三千里自有本律非如此律之比
朝家用法不可捨律而加其罪上命依議

七年

原本作八年今釐改

命俊傑減死正配教曰殺人者死三

尺雖至嚴年纔九歲則特一矇無知識之人古人所
謂如得其情哀矜而勿喜者正指如此輩而說也斷
以一罪實涉矜惻命減死定配

閔鼎重議曰禮曰悼與老耄雖有罪不可刑今此俊
傑以九歲兒毆打虎良致死於三日之內聖上憐
其幼而情不出於故不忍斷之以法特發矜惻之
教此實出於禮經悼不加刑之意抑臣竊念閭巷

之間穉小之兒因其鬪鬩至於傷殺者必因治其
父兄重施笞杖俾有懲戢禁飭其於革俗化民之
道不無少益矣上命依議

補吏曹叅判李敏叙疏曰中外按獄之臣亦皆視
朝家旨意氣色一以滯獄稽囚為事罪囚之稍犯
重科者老於獄中不赦無期至有數十年不決者
凡人之拘囚楚痛怨號鬱結者豈知其身之有罪
與無罪哉久滯之重囚亦豈無抱冤而未伸者哉
亦望嚴飭中外勿論罪名之輕重速為議讞蔽斷
法伸於姦冤恩行於冤屈此實理平之要道也

補九年因天災將行䟽決正言金構䟽曰不寃情罪以赦為務罪犯因赦情在怙終者並施曠蕩之典則其為小人之幸則大矣無乃有乖於上天示警之意乎赦過宥罪厯代常典而然亦未嘗不致慎於其間聖有赦小過之訓傳有慎無赦之戒何嘗曰輕釋大罪以幸小人如今日之為乎當此天怒民怨虞憂溢目之日尤宜明罰勅法彰善瘴惡使人心服而朝綱肅未聞不別善惡不論情法徒以煦濡苟且之政為格天感人之道者也

教曰近來擊錚之紛紜必由於方伯守令牽於私情

拘於形勢知非誤決之致也如此則民安得不冤乎
至於秋曹詞訟之積滯莫甚於今日或牽掣私意遷
就歲月趣未回啓良可寒心自古毋踵前習復有不
遵法令者論以重罪雖然不問輕重混同放釋則僥
倖之徒不無希望之心必須叅酌情犯量宜善處

（補）吏曹叅議朴世采筵奏曰仁廟朝反正之初反
逆屢起故當時勲戚大臣慮其逆節不明刑獄太
濫則有害於國凡告變之類不必皆施一律而有
所酌處者

十年

原本作十一
年今釐改

上謂金錫胄曰向見刑曹文案有

百年殺獄事卿亦聞之乎母有奸夫其父痛心致疾
臨死遺令必報讎一日奸夫來在其母之室百年不
勝其忿且不忍負其父遺言遂刺殺之事發不自諱
矣錫胄曰臣曾見漢史景帝時有妻殺夫而其子又
殺其母帝不忍決時武帝穉年在傍曰其母殺夫時
便不成其母有何不可殺之義乎景帝大奇之臣意
此獄亦可宥矣上意憐之後因旱特放該曹孰不可
遂流之

十三年

原本作十四
年今釐改

下教曰春玉痛夫非命含哀積

慮卒乃刺刃於讎人此實丈夫之所難能而出於鄉

曲賤女極為嘉尚合有褒獎之典律既有為父母復讎之文夫讎之自在其中可知擅殺之罪償命之律非所舉論特為旌閭以示朝家彰善癉惡之意

時慶尚道私婢春玉為其夫復讎將償命該曹請議于大臣皆以為子之父妻之夫其義一也其所以處復讎之道不宜異視且其夫致死之時發狀告官則擅殺之罪亦不當施此女義烈足以警俗可褒而不可罪矣

補十四年領議政南九萬筵啓前者領敦寧金壽恒以訟者三度得決後更訟至於七八度相為立落者

彼此勝負相當毋論前後得決以時執為主事定奪
故臣意再度得勝更勿立訟事既有先朝受教而法
外起訟且計其度數以時執者為主事理未安故請
更申再度得決後不得起訟之法聽理官員論罪事
既已蒙允矣卽因刑曹全家議減公事考見前後受
教則明廟朝有三度得決後更訟者全家之法先朝
辛丑年因大司諫趙復陽所啓再度得決後起訟者
亦有全家承傳矣以此言之法外聽訟官獨為論罪
而立訟者無罪則非累朝受教之意訟者定罪事亦
為申明何如刑判徐文重曰再度見屈後立訟者亦

當定罪但數三度接訟迨至累十年或有父子兄弟
相繼接訟者或有前後摠面迭出者而法典有偽造
文記雖稱祖上所為亦為論罪之文此類亦以再度
後更訟論斷乎或非一人則亦難以計度數定罪似
當有定式之事矣南九萬曰所爭之財若是一般則
族屬中摠面立訟者似當合計度數定罪矣上曰再
度得決後更為起訟而聽理官員旣以罷職論斷矣
立訟之人父子兄弟繼訟及摠面迭出之類皆以一
人連續起訟定罪而近來全家之類甚多有議減之
命此類亦議減全家稟定當律後施行

十八年上覽湖南殺獄按問多踈漏乃下教曰殺獄之最緊最重者莫如檢覆一有不明苑生係焉可不詳審乎間有外方守令厭其親審付之下吏因緣用奸任意增減獄事遷就至有數十年不決而瘦苑者此怨寬之所由興也予其惻然其令該曹知委諸道自今以往該官必親自開檢一從無寬錄母或有難明未盡之患

四十一年教曰癸甲兩年啓覆連因事故不得為之若或應死者徑斃未免失刑可原者瘦苑亦甚可矜令年則三覆必欲越冬前為之分付刑曹而行刑必

待季冬舉行先是啓覆無定限叅贊官徐文重啓啓
覆時月取考日記則仁祖乙丑九月本院引秋分後
春分前啓覆之例稟定於九月初十日而因當八人
員座次考出實錄則啓覆現出者一則二月二十五
日一則三月十七日以此見之宣廟朝則不拘於春
秋仁祖孝廟朝議行於九十月矣今之必行於冬至
後者未知何意而窘迫淹滯誠如大臣所達自今秋
分後卽為啓稟以九十月間擇日而罪人行刑則必
待季冬以遵法文之意後之

英宗二年命議李範獄案靈光李範舉狀本邑曰晚

得一女一男而妾子有機以為嫡同生非嫡母之己
出取婢僕所產而為己子者請治其罪本邑倅查問
有機有機曰嫡母潛取婢子時果目覩又問所謂女
之父母男之父母則皆曰是吾女也是吾男也果潛
納上典又問範之弟與庶弟則亦曰非範之所生也
範亦曰今始覺悟自服獄久不決命議大臣判府事
閔鎮遠議曰範招云其妻十七年斷產之後五十一
歲生女五十二歲又生男按黃帝素問曰女子七七
天癸竭地道不通故無子也七七四十九也世之婦
女四十九歲受胎五十歲生子者間或有之而絕無

五十後生子者况五十後逐歲生子於十七年斷產之餘此必無之理也。範以合血為請，本道推覆時合血則不但子母之血為合，他人之血亦相合，以此不可憑驗，故置之云。似是未曉古人合血之方而然矣。有機考律勘處其餘，依本道處決恐得宜。上命依議。補五年特進官趙顯命筵啓：今番逆賊既是稱兵犯闕，故兄弟妻妾亦有些誅者。後世若或援而為例，雖非舉兵之逆，輒用此律，私黨報復之類，亦得以藉口而快口焉。則其流之害甚大。肅廟朝有特教初行者，後勿為例，有定式之事。今亦依此逆賊舉兵者外，兄

第妻妾勿為坐誅事定為令甲何如上曰如夢顯輩
切痛故用此律而後弊所闕則誠如所達定為令甲
可也判義禁金始煨曰昔年自點之逆獄其黨邊士
紀情犯絕痛而忍杖而斃故其時與承款者一體同
施孥籍之典矣其後庚申逆獄時趙惺亦杖斃而以
其情犯之狼藉亦用士紀例孥籍壬寅獄事時杖斃
而用孥籍之律者亦非一二曰一士紀創開法外之
律其時雖有後勿為例之令而庚申壬寅據此例而
行之視若應行者然法之難擾有如是矣

補以閔家諸幼穉賊鎗一族曰臺啓有盡為發配之

舉教曰閔家世為凶逆雖殄滅無足惜而天道不以
虎狼蛇蝎而盡滅之使無遺種為凶逆者亦不可盡
滅而無遺類則當一遵法律故頃日豐原君亦有所
達矣向來光城家子孫盡為發配者實為已甚今此
諸閔事雖無是說而亦當一循法律且賊鎋家則視
諸閔家初非廢族而舉族為逆尤為可痛而亦何可
盡配其餘族乎禮曹判書宋寅明日向來姜必慎有
此言而臣則謂其已甚矣沈充從逆而其子為國忠
臣豈可以逆族不許親踈盡為殄滅乎古聖人定為
一切之法而未嘗法外用律或恐後世借其名而次

次循用蓋用法於逆賊雖過重固無可惜而或罪不
至於大逆而任情引用過為法外之事則其弊無窮
故定為法制使不得踰越今此大臣所達是矣工曹
判書尹渰曰當初盡配閔族者非用收孥之律也實
依武王遷殷頑民之意而三五歲兒盡配絕島終未
免已甚其收孥當坐者外諸族之盡行島配者就其
中區別年限叅酌疏釋則似好矣大司成趙顯命曰
重臣所達至精矣初非用緣坐之律則恐不當以法
外論之而既已定配之後一併放釋則恐涉顛例應
坐外年弱為先定限放送似好矣寅明日閔趙諸賊

與賊晟夢顯輩何異而獨於此用法外之律終始失
平治逆雖尚嚴而法律之外未可輕議故昨年帳殿
八侍時亦以此有所仰達臣之迷見惟在於謹守常
法矣大司憲李廷濟曰諸閔之當初盡配者似亦非
緣坐之意也大抵閔趙諸賊或累世為逆或舉族為
逆在人臣為國之道不可不深慮而過放矣今若用
适明璉加一等例限四五寸坐之而其中兒小則叅
酌分揀好矣而亦不可置諸輦轂之近地矣上曰法
外用律雖快一時之心而法一低昂則豈無疑懼者
乎諸閔中或不從逆而有向國之心則視他人豈不

尤賢乎當初泛允臺啓矣今則不可旋為盡釋其中
十四歲以下者為先區別放送而賊錦舉族為逆八
人杖斃則加一等用律之言好矣而如有翼維賢弼
顯思晟諸賊俱不用此律獨用於錦家則亦未免失
平錦家則應坐之外勿為舉論可也

(補)十六年上講丘濬大學衍義補至折獄惟良之文
教曰昔宋太宗始用儒士為司理判官以其能用經
術之士使之審獄故有平允之效若行此道今亦猶
古也仍命另擇刑曹即官凡議律勿專委律官為長
官者亦以其能否為之殿最

補二十年因罪犯綱常情理深重者杖流下教曰噫人之秉彝本有其性豈有犯此律者而若有所犯教化之不宜官吏之不及蘓瓊者然其犯者此律猶輕而末俗浮謗難信求諸古事於此等處亦不無抱寬者此其時京外執法之官其可泛以考律處之其宜深諒情僞者也

補又教曰凡殺人之律雖有疑端推官惟期承款不為細究詳覆之後三覆審慎蓋所以恤刑而若係殺人則其不克慎三尺為準是豈王者之道曾前叅以情法減律之類雖不條列於續典此則俱在該曹謄

錄凡於啓覆叅情法考前例莫曰承款務為消詳稟
旨裁決

補續大典 詞訟衙門決訟月日每朔移本曹考勤
慢處之京外官獄訟越不處決滯囚經年者查問罷
職○推鞠罪人請刑拿請查鞠廳完議以啓叅鞠臺
官毋得獨啓○每赦令時罪人放未放京則本曹義
禁府外則觀察使分等錄啓已至配所未至配所未
及就囚者並為舉論而未至配所京外時囚徒流案
俱不見錄該司查出別單書入○凡宥旨前事啓請
上裁犯在赦令六朔前者及事發赦令六朔後者並

勿舉論○永不除職者過十年遇赦永不叙用者過三年遇赦稟旨書入同罪被謫而生者蒙放死者仍在罪籍則每赦令義禁府具罪目別單稟旨○聽理三度得伸云者按訟三度之內一隻再伸之謂也再度見屈之後更為起訟者以非理好訟律論一落一勝則更訟二度得勝之後則勿許更訟

○補十八年九月命以仲季冬行啓覆初上命承旨考列聖朝啓覆月次宣祖朝不拘春秋而行於二三月仁孝兩朝多行於十月先朝亦行於九月十月命自今啓覆定行於十一月十二月

(補)二十一年傳曰書不云乎欽哉欽哉惟刑之恤哉
王者所慎莫先於獄今番京外審理其所決放者九
十有四噫其果詳卞黑白抱冤者得伸乎抑或其被
殺者抱冤倍而被放者其僥倖乎雖然以與其殺不
辜等文推之王者豈更較量乎噫被放者雖九十餘
一人枉羅妻孥呼冤以此推思因此而伸其冤者其
幾百乎噫古人云人之改過不若初無過焉此亦猶
此審理豈常有之事乎不然于今放釋或雖曰過矣
首尾細究果有疑而模糊同推者或有焉道臣狀聞
秋曹過焉據法而因循者亦有焉若無今舉物故罔

圉之外無他道也豈王政之所忍歲十審理不若一道臣之詳審又不若一推官之得人此所引古人所謂不若初無過者也諸道審理皆迴道臣又復泛泛而秋曹亦不着意則此若亂絲朝雖解其弗更檢暮又亂者也今以審理二字視作諸道道臣京中秋官無職之名身常在於審理名則雖欲放過焉敢懈也補左議政宋寅明筵啓關西審理使以為常漢最重殺獄一有犯者諸族皆起獄成之後一邇請檢官一邊報檢狀財竭於官人之接待雜物之酬應力竭於營門往來官家之等待故屍親之歛葬視若餘事而

及至日月稍久族黨盡散則讎未報而家先敗自今以後凡有殺讎其初覆檢時其凡物之備下吏之供或自官家齎去或令本里擔當檢官請來及營門狀報則依他文書例有撥則付撥無撥則付公事夫勿使一毫侵及於屍親事仰陳而此則宜申飭嚴禁矣領議政金在魯曰非但屍親之擔當供給正犯之家作亂分蕩之弊亦例而孔甚矣上曰勿論京外屍親元犯一體申飭可也

三十五年教曰予於印偽造處決有尋常耿耿者今於暮年何不諭乎既下詢大臣大抵偽印之律本非

大明律在於大典而或有無印文而成案置諸大辟者曾前此等之律其雖傳生若或差之人命豈不重乎亦非大典之意也此後則京外法官成案時其宜審慎事申飭于秋曹捕廳及八道三都

三十六年命旌尹呂史問高原僧簡相劫奸尹女尹女不從為簡相刺殺該曹覆啓教曰此等事何待三覆快施其律當以謝尹呂史之烈魂然制法既重三覆不達律三覆命依律而尹呂史之貞烈不覺凜然何待簡相之正法其令道臣樹石旌閭于立節處亦令本郡特為設祭慰魂以礪一道復戶等節一體舉

行

四十一年下教曰昔有王世命之事心常歎其孝子
矣檢驗雖不實辭證俱脩則不當追檢况已埋者乎
噫周文其有掩骼今則至於白骨檢驗予則曰當之
者無異再被殺人或有不償命者事之殘忍莫此為
甚此後殺人而匿埋者依例檢驗後自官埋置其他
已瘞者勿檢事載於受教

續今上元年傳曰昔我肅祖之教有曰殺獄之最緊
最重者莫如檢覆間有外方守令任意增減獄事遷
就至有數十年不決而瘦死獄中者自今以往該官

必親自開檢一從無寬錄母或有難明未盡之患亦
惟我寧考之教有曰檢驗雖不實詞證俱備則不當
追檢况已埋者乎周文其猶掩骼今則至於白骨檢
驗予則曰當之者無異再被殺人或有不償命者殘
忍莫甚此後殺人之匿埋者依例檢驗後自官埋置
其他已瘞者勿檢大哉聖人之言也重民命恤刑獄
之義藹然於辭教之外傳曰先王斯有不忍人之心
行不忍人之政斯其非歟予於是三復百回非但莊
誦激昂也向於賓對相臣之奏以為自有先朝掘檢
之禁令京外不敢開檢按驗不無幽鬱之慮予於其

時只知肅祖之教未詳寧考之教故意以為然詢于
廟堂爰及三司至又有重臣欲許掘檢則今日以前
當屬令前之對矣繼又玉堂劄請掘檢予意亦以為
然擬欲定制而未果者出於慮遠之意也况當悶旱
之日其所審恤之道尤宜靡不用極取見先朝受教
則寧考之聖意亦只是肅祖之聖意而非為禁掘之
教也向者相臣重臣之奏與夫玉堂之劄置亦不外
是也近來京外之不得掘檢者特以掌讞之官不能
詳悉領略於受教之致大抵無寬錄掘檢之法欲防
私和匿埋之弊則先朝受教中殺人而匿埋者依例

檢驗之教豈非肅祖受教中一從無寬錄之教也歟
今有議者或以下勾中其他已瘞者勿檢之教為朝
禁而此則有大不然者此則指白骨檢驗之謂也今
則別無申定令甲之事一依兩朝受教遵而行之至
於久遠之掘白骨之檢藉此申明之日爭起互訟若
有紛競之端尤非先王欽恤之本意也今日以前已
埋者便屬令前切勿輕易舉論此後又或有年數已
久可以掘檢者亦勿徑自開檢必也啓聞後為之事
定式施行知委京外

續八年脩局啓曰京獄之行檢成案極為踈漏不成

依樣今以慎獄之聖念特下定制之傳教臣等與金
吾秋曹之臣徃復相議成出節目別單書入之意敢
啓答日事目大體詳脩而今審定式本意專在於除
滯獄之弊也觀此事目諸條則完決條中無端滯獄
經月踰歲不卽決折者當該堂卽論罪一款不可不
添書更為磨鍊入啓可也至於日次罪人之或有閱
月不訊推之時此亦及今定制俾勿如前因循可也
(續)京獄檢驗事目別單殺獄者人命之所係有國
之所重也傷處案因置在檢驗正犯執定又在詞
證於斯二者不可闕一故初覆檢時無待各人取

招仍又出意見論報掌刑之官論理題辭指日會
推可以窮覈者窮覈可以疏釋者疏釋法例卽然
京師四方之表準而所以治殺獄者極其踈漏該
部官例行初檢京兆卽例行覆檢而只以緣何致
死是如數字懸於實因之下被告元犯外絕無推
捉取招之事意見段置從以闕焉到秋曹後始為
覈覈而所謂覈覈殆無期限完決姑捨一番會推
亦拖至數朔有罪者久稽於置法無罪者反滯於
在囚刑獄論斷必待明者不專在於格例之間而
格例之草率如此尚何望其審克而不蔽乎惟戒

聖上以慎庶獄恤惟刑之念歲下詳審之命日覽
京外之案較量情犯叅恕疑輕斷囚之明如日月
好生之仁侔天地凡在瞻聆莫不欽頌而旣又以
京師獄案之大失格例特令廟堂及金吾秋曹之
臣聚會商確著成條式以爲永久遵行之道從今
以後檢法無踈略之歎李官有考據之所聽斷無
滯囹圄將空猗歟盛哉應行節目並爲條列于左
補一初覆則當部官及京兆官依例舉行而從
前檢案之不能依樣專由各部書員不解事不
識字之致而殘司吏隸猝難變通此後段部官

初檢時定送京地執吏中鍊習文案者一人使
之舉行京地官覆檢時則府吏既經初覆不可
仍送以刑曹該房執吏定送如或行三檢則刑
曹卽廳掣覆檢不叅之他房執吏進去○一初
覆檢之不得相通法意甚嚴今此京地秋曹吏
之替送蓋出於不得已而如或私自宣泄潛相
漏通有所現發則當該下吏嚴刑定配○一初
檢時檢官到停屍處開檢前屍親與被告人及
應問各人等處發問目取初招仍行檢驗檢後
取再招與初招有違錯之端則當問人訕或取

三四招或令面質必為歸一之地檢官仍以意見懸錄實因區別其正犯干犯尾陳跋辭務從纖悉○一覆檢時一依初檢時例舉行覆檢狀來呈秋曹後堂上論理題辭干連中可放者放可囚者囚○一檢後不多日內即為會推初覆檢官秋曹堂即一齊會坐發問目嚴訊反復詳覆十分無疑然後始為完決入啓○一檢後不即會推會推後不即完決延拖時月者當該堂即施以制書有違之律如或判堂有故不得舉行自本曹草記以稟○一法物洗淨銀釵試用

並依無寬鐸舉行而雖至覆檢後屍身則姑為
灰封守直待秋曹題辭出給○一初覆檢狀如
有疑端則草記後三檢自是前例而待啓下舉
行之際或致遲滯此後段一邊草記一邊舉行
○一三檢後檢驗不實之官員醫律生下吏等
會推後卽為論罪○一如行三檢則凡諸格式
一依初覆檢例舉行○一一番會推後雖有更
覈之端他司檢官不為來待○一檢官取招時
干連看證之可問隨其現莪卽地莪捕一體取
招○一初檢則屍親莪告後毋滯晷刻卽為如

法舉行覆檢則不待秋曹知委初檢官直為移
文請來舉行○一初檢時干連看證之當問者
疲殘部隸有難推提自京兆定送勤幹吏隸五
六人使之預待於檢所一從檢官分付舉行如
有慢忽之端則報秋曹嚴刑懲礪正犯如或逃
躲則卽地秘移捕廳以為當刻內掩捕之地○
一秋曹日次卽是一月六次如或一月內無故
未滿三次者依外方闕推例自政院察推

東國文獻備考卷之一百四十六

校正

刑考七

恤刑

補新羅儒理王二年謁始祖廟赦

婆娑王十一年分遣十人廉察州郡不恤刑獄者貶黜之

補炤智王立大赦

補十年二月王幸一善郡原所經州郡輕囚

補真興王立大赦國內

補十六年巡北漢山拓定封疆原所經州郡輕罪

補聖德王卽位大赦

補五年冬大赦六年春大赦七年夏大赦八年秋赦

九年春赦時年穀不登災異屢見輒行赦宥殆無虛歲

補安鼎福曰聖人制刑非所以剝民也將以懲

姦匿而肅政綱也虞書肆赦眚災而已曷嘗及怙終耶是以古昔明王無不慎赦蓋濫赦則害人不安而姦民無所懲矣今王若以災異為懼當反躬修省以荅天心若以年飢為慮當節用

愛民輕徭薄賦而刑獄之濫滯亦當䟽決無寬
甬不問情之故誤罪之當否一切施以曠蕩之
典則其為長姦養賊大矣

補百濟多婁王六年立太子赦

補二十八年夏旱慮囚赦死罪

高麗惠宗元年判年七十以上父母無守護其子犯
罪應配島者存留存養

顯宗元年勅中外務恤刑獄

楊規䟽曰政以立法刑以補理法如不行不可無
刑以齊之然書曰敬哉敬哉惟刑之恤哉又曰明

德慎罰則刑者所不能無者而亦不可不恤者也
自古理天下國家者必先修其典輕重有差而臨
刑者不迷受刑者無嫌矣今者不然凡施刑者皆
出妄意而或受賄賂或諂權勢或諱親故罪雖可
殺而不受一笞一杖至於無辜或陷極刑愚婦赤
子咸被殺戮恨成惡積而乾文失道地怪屢警歲
比不登獄訟繁興願克軫欽恤無俾冤枉焉

〔補〕文宗三十三年江陰縣有盲人謀姦人妻因殺人
當死依律文八十以上十歲以下篤疾例論減死

〔補〕宣宗二年御宣政殿聽斷死囚停音樂進素膳

補五年以久旱詔曰豈中外囹圄有眚災乎其輕囚薄罪並原之

補七年制曰近來災變屢作時雨愆期朕甚懼焉其内外公徒私杖以下輕罪悉令放除諸官吏犯法罷職者理無私曲量叙本品

補獻宗元年以李資義謀亂伏誅詔曰雖已拔亂益勤脩省凡諸寬獄悉令寬宥内外贖銅諸小罪皆許免除

補肅宗三年尚書刑部奏獄空宰相邵台輔等表賀王下教荅諭曰朕謬承先業思理下民日覽萬機但

積勤苦之念時清庶獄實由夾贊之能何歸義以盡
心遽剡章而展賀載惟誠懇良切歎嘉宰相又表謝
(補)七年王幸西京制動駕以來從行先排使及當京
留守所奏犯輕罪者並令原免

肅宗即位初

原本作肅宗
十年今釐改

御史臺奏今圜圉空虛請

書獄空二字於法司南街以示盛世刑錯之美時經
大赦罪囚皆放故也

元年詔曰中外法司問罪雖有明證必三拷問以為
常所犯非深重者因而致死其於與其殺不辜寧失
不經之義何自今法司體予欽恤之意已伏罪者無

論輕重不必拷問

補六年判四月放輕囚五月重囚緩枷鎖以為永式
補八年王幸王輪寺還至刑部南街獄囚望駕同聲
呼萬歲命近臣就獄賜酒放輕繫

仁宗二年判推問罪人不審罪之輕重使無識杖首
慘酷結縛官吏習以為常使無辜殞命今後臺省內
侍貞當四季監獄按問隨即科罪

補六年以天文有變令有司慮囚赦二罪以下

補十四年判囚徒無養者官給食

補高宗二十二年制國家移都民方瘡痍又經狄兵

甚可憐恤其中外二罪以下並皆原免配島歸鄉者
量移

補四十四年以年饑赦二罪以下

補四十六年以王不豫赦二罪以下

補忠烈王元年王不豫放二罪以下承宣洪子藩言
去歲旣下宥旨今而復下不亦數乎恐犯法者益衆
京中見囚請以口傳宥之諸道令祈恩別監傳命放
之可也從之

補史臣曰洪子藩言宥旨數而犯法者衆其是
矣然請以口傳放囚何哉使犯法者得脫宣旨

與口傳何別乎後世權豪藉口傳釋法司罪囚
未必非子藩啓之也

補二十二年宥二罪以下時王年六十一術者有摠
甲厄年之說故推恩肆宥

恭愍王元年教曰内外官吏未取諸囚招辭面縛亂
打傷肌膚害性命予甚悶焉今後毋得法外亂刑違
者罪之其軍逃役者隨所犯杖之吏民有罪者亦加
笞並勿罰布貧污犯贓者不在此限又罰徵非罪民
極于病比來中外官曾不恤刑旣杖且贖民何以堪
宜令毋得並行杖贖如有違者許諸人赴官陳訴倍

數徵還刑罰明有條例不宜輕重出入自逆臣擅柄
凡用笞杖必中虛恟既貶之後陰囑管押押人中路
殺之深為慘毒今後中外執法官吏敢有如此者都
評議使申聞斷案

十九年詔曰比來掌刑之官不能舉職使無辜之人
久在囹圄冤抑未伸以致乾文失次時令不調未知
異日將為何變其令憲臺審治冤獄又曰凡官吏拷
訊罪人多殺衝刺使不忍苦誣服致死今後諸囚訊
問不敢移時其犯笞杖輕罪者勿用非法拷掠

金 命疏曰典獄罪人所聚厲氣蒸染疾病易生

死非其罪甚可恤也乞令醫官六朔相遞全仕典
獄察病囚證候劑藥療治以脩橫禍又令刑曹正
佐郎一員於月內考察獄官醫員勤慢

○補恭讓王二年遣提控朴為生等鞫李乙玆于清州
辭連少尹元庠王謂知經筵鄭夢周曰凡鞫囚當徐
察其情今巡軍不依法律遽加慘毒無辜或死予甚
悶焉况宰相雖有重罪賜死可也遂釋庠

○補以清州大水遣吏曹判書趙溫放諸囚安置又以
久雨放京城罪囚百五十人

○補七月大赦賚成事鄭夢周以臺諫論執彛初之黨

甚力啓王宜因封崇四代大需鴻恩從之

補王召刑曹判書趙勉等曰今天變屢興旱魃尤甚此必冤獄所致凡獄囚當死者誅之當赦者赦之宜速決遣毋久淹滯以順天心

補三年時有為父殺人者刑曹擬罪杖八十都堂以為雖為親殺人厥罪匪輕王曰為親殺人其罪可赦竟原之

補本朝太祖元年大護軍李扶奉常少卿許曠有不遜語大司憲南在等請鞠治上笑曰帝王之興不係世類尚矣大明皇帝亦以匹夫得天下世類之說何

足介意况偶與家人語乎何必鞠問臺諫固請命只
流于外

二年久旱命中外用慎刑罰辨析詞訟教曰罰不及
嗣大舜之德罪人不孥文王之政予切慕焉自壬申
以來妻以夫罪予以父罪沒為公賤者除情跡著見
律有正條外比係重論者并皆原免教中外大小臣
僚慎刑罰一新庶政

命放王氏諸族之在海島者下教曰自古王者初定
大業猶恐前朝苗裔為已後患必欲剪除予則不然
天命寡躬以為一國之主凡在境內皆吾赤子一視

同仁以荅天意今王氏族屬八處海島生理困苦予甚悶之其令安置各邑無致失所

(補)下敎曰近天譴屢見天意必有所在戊辰年間誅

死者家產奴婢並皆屬公妻妾子孫孑立窮困哀怨日深天之譴告恐或由此自戊辰以後即位以前凡坐籍沒者一皆原宥家產奴婢並給妻子俾遂生業(補)六年赦金羅道都按撫使朴子安苑子安以應接降倭失誤軍機當斬已移書令誅之以事干彼賊秘而不宣外人莫得知之其子實詣太宗潛邸役地痛哭請活父命太宗心傷之欲與宗親請貸其苑宗親

曰此國家祕事也上若問從何得知何辭以對太宗
曰我將任其咎即詣闕令內官曹恂啓請之恂曰此
祕事也何得知之太宗曰刑人國之大事外人
豈有不知之理恂入啓上乃悟即命宥子安馳駟傳
命子安方臨命乃得不死太宗賢其救父使實掌禁
旅位至二品

補七年刑曹判書柳觀啓曰人之氣稟勁悍剛果柔
懦怯弱不同故或有真犯而能耐捶楚終不招承或
有被誣而不忍苦毒終不脫免者掌刑者惟喜人之
承服不顧人命之重設法外之刑多方掠訊其罪未

著而已斃於梃下有違聖上好生之德乞令中外用
刑者止依律文以行拷問其法外之刑一切禁斷常
令辨其辭色驗其證佐要明其真偽不得妄加捶撻
上嘉納之

補定宗元年七月命禁京外濫刑之弊

補太宗六年上聞囚庾苑獄中謂知申事黃喜曰可

殺則殺之豈可使滯獄而死乎自今令法官勿滯獄

九年

原本係十
年今釐改

丹山府院君李茂以罪繫獄獄官並

鞫其子公柔受杖九十終不服上聞之曰是問之者
過也子為父隱寧至於死安敢證成父罪乎即釋之

世宗四年下教曰聽訟之法固當虛心清問聽死罪
求可生之道聽重罪求可輕之道究情科罪尚有所
失况不察情偽以威逼之使無罪之人入於極刑若
信此斷案豈不濫殺無辜仍飭中外慎恤刑獄

七年下教曰獄者所以懲有罪本非致人於死司獄
官怠於審察獄囚於祈寒盛暑或罹疾病或因凍餓
間有非命致死者中外官吏體予至意淨掃囹圄療
治疾病無家人護養者官給衣資如有解緩不奉行
者嚴加糾理又下教曰刑以輔治律以斷刑古今之
常典也雖然律文所載有限而人之所犯無窮所以書

有律無正條引律比附之文夫刑固聖人之所慎而
上下比附毫釐之際尤所當恤今之法吏比附之
際寧從重典予甚悶焉罪之疑於重情理相等者當
從輕典若情理近於重者務合於法書曰欽哉欽哉
惟刑之恤哉予所服膺又曰式敬甬由獄以長我王
國攸司其念之念之

八年圖奸獄頒中外下教曰大小刑罰克用慎恤雖
一笞一杖皆用朝廷律文切禁狂濫明載教令頒諸
境內掛之廳壁常加警省至於犴獄作圖以示中外
依圖營構寒暑異處周恤甚脩無由橫罹瘦病者

十二年除笞背法下教曰人五臟之係皆近於背官吏拷掠之際率多鞭背頗傷人命自今除笞背法京外官吏或有違者抵罪

十三年下教曰刑者輔治之具雖古之盛時固不得而廢也舜為天子惟刑之恤臯陶為士明五刑以弼五教克底雍熙之治吁盛矣哉降至秦始皇尚殘暴而趙高之徒務刻酷無仁恩二世而亡可不戒哉蓋獄者人之死生係焉苟不得其真情而求諸捶楚之下使有罪者幸而免無罪者陷于辜則刑罰不中舍寃負屈終莫能伸足以傷天地之和召水旱之災此

古今之通患也予觀中外折獄之官最初鞫問文案
苟成後之覆案者率皆因循文致其辭未有叅驗詳
寃以求事情者也噫死者不可復生刑者不可復續
苟或一失悔將何及此予之夙夜矜恤未嘗頃刻而
忘于懷者也繼自今為吾執法者精白虛心無拘於
一己之見無主於先入之辭毋雷同以效轍母苟且
以因循勿喜囚人之易服勿要獄辭之速成多方以
詰之反覆以求之使死者不啻寃於九泉生者無抱
恨於方寸則羣情胥悅致囹圄之一空協氣旁流臻
雨暘之時若

二十六年下教曰國俗嚴上下之分奴婢有罪而其
主殺之例皆右其主而抑其奴此誠義意也然刑賞
人主之大柄以人君而殺一不辜猶且不可況奴婢
雖賤是亦天民也豈可濫殺無辜人君之德好生而
已坐見無辜被殺寧不惕然自今奴婢有罪不告官
而毆殺者一依舊律科斷如有炮烙劓黥面刻足
及或用金刃木石一應慘酷濫殺者當房人口依律
屬公

補二十七年下教曰監司守令不體予意凡獄訟一
以深峻為務至使有罪者得脫無罪者繫獄致傷和

氣予甚慮焉遂諭諸道觀察使曰大抵刑獄得情難而失中易曾降教書告諭丁寧然以州縣之多守令之衆安知無用刑過中聽斷不明無事之民久繫犴獄召傷和氣者哉予甚軫慮卿其曉諭守令凡諸獄訟毋慘酷毋淹滯虛心明斷以副予欽恤之意

補上嘗命崔致雲註無冤錄又命講解律文凡斷疑獄必召致雲議多所平反

文宗庚午下教曰刑獄之設固非得已而縲紲之間易致冤枉故歷代願治之主莫不以訟獄淹滯為戒唐立三限之法大事之限大理三十五日刑部三十

日共六十五日以此而降至宋太宗又為之法而嚴其督課無非為滯獄之致寃也惟我祖宗咸以明德慎罰為先務逮我皇考好生之德出於天性屢下恤刑之教丁寧諄切叅據古典亦定三限載在六典大凡事干死罪辭證在三十日程者為大事事干徒流辭證在二十日程者為中事事干笞杖辭證在十日程者為小事大事限九十日中事限六十日小事限三十日事無大小辭證在境內刑迹明著不過十日其易者不過三日其有刑迹難明辭證牽連不得已過限者具由以聞且於季月監獄慮囚輕罪則出放

之如有淹滯委司憲糾理今觀唐之立限寬於宋制
我國之法視唐尤寬而過限者尚多何哉夫刑獄貴
於審覆固未可求速誠能盡其心力三限日月亦已
足矣近年以來臬司不能仰體至意尚有因循或失
於清明或短於裁決初非曖昧可疑之事例以不緊
節目往來推覆不即斷遣遂使無知小民一遭捕繫
動隔炎涼飢寒疾病因以致死者有之且囹圄之苦
度日如年一夫在獄舉家廢業傷和召灾孰甚於此
予以寡昧獲承前緒恐不克紹先志以傷吾民夙夜
祇懼若墜淵谷嘗聞一人向隅蒲堂不樂四境之內

皆為卧榻之側匹夫不獲咎實在予凡爾典法亦皆
先王舊臣其可不體先王之意以誤無告之民乎繼
自今恪慎乃職務遵成憲凡有推讞無或稽滯使獄
無幽枉之寃民被生成之澤用無負寡人祇承欽恤
之意

諭中外司獄官吏曰犴獄之設本以懲有罪非欲致
人於死故累降教條務令矜恤而司獄吏卒非法困
囚以肆侵漁自今許囚人親屬陳疏以伸寃抑朝臣
降外任朝辭皆引見諭以愛民恤刑之意俾無寃屈
焉

補端宗元年教刑曹曰今當農月雨澤愆期慮有滯
獄傷和召灾犯流罪以下囚人及重罪之證左連累
者並皆保放又使馳驛移文于諸道

補二年特教曉諭中外年未滿十六及未嫁之妹勿
令緣坐

世祖二年下教曰人君雖有好生之德任刑獄者不
能精白一心輕重失宜則人主安能親執其事乎予
任尹子雲保無虞矣予與子雲斷獄是日乃安寢食
矣

補三年教諸道守令曰天生烝民立以司牧天不能

自為必借之人君人君不親督庶務必委之百官然則人主與百官均是代天理物君不恤民事天必降之殃禍若所為合於天心則歲豐民和康疆壽考子孫逢吉守令亦如是焉若體予意愛民如子刑罰無濫清白勤儉則現有超賞先家及孫名垂後世若貪刻苛怠貽弊於民則即受刑戮身死家亡為世罪人夫十目所視其能掩乎予以好生之德思濟一國近放遣笞以下罪囚猶慮杖以上罪囚亦或有曖昧冤枉者嚴冬繫閉非命殞沒天心必矜汝等體予至懷急錄可放罪囚以聞

補十二月天甚寒以酒肉饋禁府典獄之囚繫者

補四年四月大雨命注書往視金吾典獄漏濕分遣

宣傳官往五部審水邊人家傾危者令移接他處

十二年

原本作九年今釐改

尹弼商以刑房承旨八直適值夜

氣嚴寒揣知上意當恤獄囚歷考京外囚徒罪犯輕重錄於小冊子置几案夜五鼓命促召弼商顛倒衣冠袖錄囚小冊而入上教曰今夜天寒倍甚燠室重裘亦所不堪犴獄苑囚觸冒嚴寒慮有凍死之弊遠外不可及也京獄見囚幾許其速盡錄以啓弼商即應對曰臣守任刑房刑獄之事乃臣職分仍歷數以

啓上驚異稱賞曰此予寶臣命疏釋諸囚

補睿宗元年教曰天道生育萬物其有夙霜雷霆非
好肅殺也以其乖僻沴盭者不得不蕩除使囿於太
和元氣之化也人主撫綏地庶其用桁楊鑕鑕非喜
刑威也以其兇頑暴逆者不得不誅鋤以行其大中
至正之政也予以寡昧叨襲艱大凡有施措慮或失
宜尤軫用刑未能明慎以觖輿望夙夜兢惕奉三無
私反覆克審庶無向隅之寃顧自即位以來冒法抵
死而已多是雖予德未上繼化未下究而然亦無非
自罹邦憲以速其辜也辟以止辟刑期無刑予豈愛

一人之命坐視萬民之苦哉肆不得已加刑也嗚呼
惟皇上帝伊誰云憎尚慮大小臣民或未悉予欽恤
之意播告中外咸使知之

成宗十一年下教曰司獄官吏所失非一苛暴慘刻
者常失於羅織昏迷庸懶者常失於淹滯好羅織則
深文峻法嚴加拷訊援引傳會一切增飾無辜之人
橫羅斧鑕好淹滯則依違不決動隔炎涼櫪桔加軀
飢寒切身悲號疾病遂死犴狴豈不冤哉嘗聞一人
向隅滿堂不樂匹夫匹婦死非其辜咎將誰訊大抵
獄辭初若膠轕緣情推究迎刃自解但司臬者不加

之意而已無或爾羅織無或爾淹滯本之以仁恕行之以明允使死者服辜生者無冤豈不義哉

補韻玉曰成宗朝士夫之竄謫遠者例令自其官供給云

補經國大典 三日內毋得再行拷訊拷訊十日後

決罰

隆寒

自十一月至正月

極熱

自五月至七月

時事于綱常職

盜男人杖六十以上女人杖一百以上外其餘杖一百以下並收贖自願受杖者聽

補中宗二年下教曰王者於民導之以德懲之以刑刑非得已也然刑期無刑辟以止辟所以遠罪辜而全

性命故聖人制官刑儆于有位陳臬事以戒司獄漢
文德化幾致刑措唐太宗決大辟斷肉宋太祖月令
司獄灑滌枷杻仁宗不敢罵人以死三代以下慎刑
者唯數君耳秦政殘虐刑必夷族隋法苛刻盜瓜者
死以致國家暴亡豈非民不見德而然歟惟我祖宗
仁厚立國忠恕率下百餘年間民無冤枉不幸甲子
以後政尚刑威上自士夫下至黎庶橫罹非辜門誅
族滅祖宗家法掃地盡矣予自蒞位以來日夜思復
仁厚之政昔路溫舒告宣帝曰今無金革飢寒之患
而太平未洽者刑獄亂之也况我民庶甫出膏火讞

獄之官若務深刻或致淹滯豈不寃哉其令中外獄官毋或妄加一意欽恤焉

補一年命除斷筋之律上以竊盜斷筋之律問于金壽童壽童對曰斷筋是肉刑也前以盜賊興行之故用之以救一時之弊耳不可永以為法者也上特命除之

補六年教曰亂杖之刑本非國法自今禁之凡於刑訊只用校正之法

二十八年嘗失原廟神板一位人皆疑下輩欲陷殿官而為之作變命囚叅奉及守僕等鞠之竟不得其

的然之端緒時鄭光弼為推官以為此乃疑獄若期
於得情則嚴加拷掠之際必多冤濫之弊於是啓緩
之後刑曹偶捕賊人自服偷取位板藏諸某山巖下
依其言尋得之

補二十九年值亢旱親禱于慶會樓池邊暴日露坐
幾至浹旬間有衆樂聲問之乃房主監察行禮宴也
上大怒二十四人皆就詔獄令其子身上䟽乞哀上
愈怒盡執八拜䟽之人遂皆散走獨房主監察之子
不去被執上御便殿親問曰汝童稚何獨不走對曰
初為救父而上章縱受罪安敢逃乎上曰此䟽誰所

作也曰臣所作也又問曰書者誰也曰臣所書也汝
年幾何對曰十三上曰汝果能之乎欺罔罪當誅對
曰願請試之命以憫雨賦為題其見立就而書之其
末以為昔東海冤婦足致三年之旱願聖上以此軫
念則成湯千里雨致之不難上見而奇之問爾父誰
也對曰房主監察金世愚也爾名誰也對曰以虬為
名上御筆書紙曰自古能文之士不能書能書之人
不能文爾能文又能書見爾文放爾父見爾文放爾
父同僚爾其移孝于忠因命承傳史官持其書從其
兒之義禁府盡放之

仁宗元年嘗留意於刑獄有司啓請拷訊罪囚必為之顰蹙曰是亦人也何忍暴加拷掠以傷其生務要審慎俾無冤枉仍歎曰在寡人之世安得吾民無有作奸犯科者耶

補李晬光曰仁廟初年大臣等以赦文內關係國家之言自成廟朝始有之此非祖宗之法又非前古赦文所載今者正始之初不可因循弊法請改之至明廟朝李苞等更請仍用遂為成例

補明宗元年命禁京外官用杖不如法者

補李彥迪啓曰凡罪人當取服定罪近日三省訊鞫過用刑杖徑殞者多恐有橫寬欲望用校正杖得情然後定罪翌日李芑見啓草忿然曰渠恐杖落渠膝故耶

補十一年下教曰為囚求生道此政之一端也予念外方獄事許多縲紲之中豈無冤枉之淹滯况今涸寒陽生之月乎其令八道司獄務速放決如有疑獄詳覆馳啓

補二十二年正言李珣疏曰當今聽訟之官多不得其人誘於賄賂怵於權貴不辨事理之曲直惟

視勢力之強弱故當路之士熾其氣焰武斷之輩
攀附要人公行劫奪民莫敢抗甚至於傷人者不
問殺人者不死怨憤之氣徹乎蒼穹夫一女抱冤
尚致三年之旱一夫含悲尚降五月之霜况今邦
域之內抱冤含悲者不知其幾則安得不傷天地
之和召水旱之灾乎

李浚慶錄遺許詔使曰囚人冬月則給鋪席夏月
則淨修獄中洗灑枷杻使無寒凍薰蒸之患又定
醫官備藥物救之貧不能養獄者官給廩料欽恤
刑獄痛繩濫刑之吏

宣祖三十年下教曰予忝位三十年未嘗妄殺一人
矣雷霆之下含冤枉死援引之際豈無橫罹常時罪
人作文屢度者過反覆叅究不能得其情況推案初
入瞥然看過即允請刑之命則呼吸之間其命立懸
不可不慎予當詳觀供招叅以啓本隨所見而發落
其間未及推治在囚者各人取招以啓且發落或不
當則卿等覆啓可也卿等亦知推鞠刑訊之際如有
可議勿嫌於盡啓所懷設使議論不一勿拘諸人之
意自陳其見以待予意可也上明慎賞罰愛惜民命
雖昆虫微物亦戒其殺傷若聞人有病則雖閭閻下

賤必欲全活賜以藥物如恐不及每當決獄必哀矜
惻怛以求生道謹守成憲苟非大謬則不喜紛更

補車天輅嘗以科場代述竄北邊按道之臣待之
特厚天輅怪而問之則道臣辭朝之日自上別教
以天輅文才可惜予不能屈法而貸之若至窮飢
則豈不矜惻乎天輅聞之南向痛哭未幾又命放
還

補壬辰播遷時嘗於行中失御弓有司捕拾遺者
欲法之上曰旣已失之必有得之者即命放釋

補鄭載崙曰鄭西川崑壽為判義禁與他僚同

監武人之犯職者有一條負駭其杖之不猛語之曰王府之杖固如是乎崑壽曰僚宰之言非矣王府乃士大夫就理之所也重杖貪職武夫快則快矣一成規例則豈無吾輩亦未免之悔也其人深服之

補光海戊申大司憲鄭逑疏論臨海獄事曰獄不必盡究人不必盡問罪不必盡覈法不必盡施寧有不經之失者存乎其間而臨海亦蒙不死之貸涵濡大恩以畢其生則光武之反側自安文帝之尺布斗粟無復謠於今日矣舉國臣民咸仰大聖

人處變之無憾也

補領議政李元翼劄曰崑崗之火玉石俱焚大獄之下寃死必多或有事狀不明白者推官雖心內疑之而不敢遽請平反倘非自上因罪求情因情擬罪開闔於常格之外則無辜之民不免陷於刑杖刑杖一加終無生理豈不惻然

補仁祖改玉後議定曩日亂政者之罪有以追戮已死為請者上揮手止之曰光海戮屍之刑慘不忍言予不欲陷其轍耳 孝廟辛卯趙貴人之獄時有追戮貴人母之議領相鄭太和以仁祖下教陳達事遂

寢未幾因臺臣吳挺緯之論啓果追戮

三年命赦潰逃軍兵李貴劄略曰蕩滌逃軍潰軍乃
莫大變通之機闕也體臣之防啓出於欲重軍律雖
不可謂無所見而以臣計之秦時軍律不可謂不嚴
而勝廣以一亡卒起以亡秦徒嚴軍律誠非固本之
策也今者逃軍或徵布或徵米或徵牛多寡既不均
以此免罪者不謂之逃軍不叅此類者謂之逃軍使
之已身充軍又令潰軍之未隼防者詐朔防守殆亦
失人心之大者且非慎刑獄之意也噫逃潰之軍誅
之則不可勝誅不問則恐有後弊今因大赦諉之於

死罪蕩滌之類以為收拾軍心之舉未為不可況潰
軍罰役古無其規數千逃軍一一盡捕致法誠非得
詐雖叛逆之卒脅從則罔治者不可盡誅故也以今
國勢皆欲盡捕則安知不走胡則聚為逃乎此所謂
為淵毆魚者也今因蕩滌而更無嚴明軍律則豈非
國家之幸也從之

補四年李峻疏曰國家紀綱不振皆謂刑法不重
則無以束民矯枉之道當用猛政古之擬律猶恐
人之入死今之擬律猶恐人之出於罪

六年命鄭雋等減死副提學鄭經世啓伏見刑曹啓

目公州居鄭霧等六人以田結欺隱偷食米斗事並請
比近例梟示已為蒙允此輩奸濫之犯極為痛憤罪
死無惜但念人命至重死者不可復生故聖王之欽
恤常在於但祖宗朝法典雖十惡大罪已承服之
人亦必啓覆行刑則重民命之意極其詳審惻怛盖
如此今因一人陳疏該曹避詆斥之嫌請移於刑曹
而刑曹遽請梟示二年遲滯之獄一筆勾斷快則快
矣第未知於聖王欽恤之道祖宗審克之典果如何
哉從之

補七年大諫朴潢疏曰赦令雖犯死罪皆有惟士

夫得罪者亡論輕重輒麗於關係國家之條此金
安老設法以禁錮正士者仁廟釐革旋為乙巳權
奸所追復至今視若功令宜斟酌之也

補九年大憲李景奭劄曰外方刑杖或用大雅打
數箇而立殞命者有之刑部治囚或一番刑訊而
致斃國內必多冤死之鬼况官府一體內需之鞫
獄何為而設也願革弊申禁毋使刑杖枉濫

補孝宗己丑下教刑官曰刑者輔治之具聖人不得
已而用之必至公無私一於平心而後民得以措手
足矣今有受刑多而不輸情者殊無輔治之意或有

一受刑而相繼致斃者令禁府刑曹劃即䟽決歲時亦如是外方監司或有濫刑殺人者不以已往而不治必拿問而罪之

補元年罪人權榮將伏常刑禁府以誕日在明啓請以緩期上特命勿拘行刑脩局進啓贊襄乾斷之赫然且曰若能斷於殄戮有罪之時而不能斷於開釋無辜之日則反有害於欽恤之聖德又曰昔漢明帝除反支之忌事無留滯至書史冊臣等其於君上一事之美不勝欣幸感悅之至敢此煩啓荅曰祖宗三尺孰非不重而今此貪贓之律係生民休戚國家興

喪判焉此法一撓則守令之慎擇繡衣之分遣皆歸
於文具故予不得已斷然行之言念其年老就戮惻
然傷懷不覺隕涕予不能教化使人人犯法一至於
此尤切瞿然若能斷於殄戮有罪之時不能斷於開
釋無辜之日則反有害於欽恤之德一句書諸壁上
以為常目之戒耳卿等亦宜隨事糾正以補予過

補四年相臣李敬輿劄曰漢高祖始約三章文景
幾致刑措四百之祚宗籍於此唐太宗止笞背之
罪雖武氏之亂安史之兵人思匡復不失舊物宋
祖不嗜之性出於天賦寬仁之治為二百年家法

雖新法之禍毒遍海內靖康之遷宇縣橫潰而人心不離者此也臣事先大王三十年至仁厚澤浹洽于民未嘗有妄殺一人是以三罹播遷之厄而民情不變今殿下志在振肅頽綱務從重科臣愚以為刑獄大小議讞凡係寬抑許令攸司有所申稟

三年上聞處絞罪人例為推殺教曰死雖一也殊非律名之本意予甚慘然其令刑官審處自是應絞者縊而殺之刑曹既過三覆罪人等將按律處斷謂諸臣曰煖氣如春沉霧四塞予心悚慄十餘罪囚皆將

伏法於今日三覆議讞猶慮其未盡復欲問諸卿等
更讞特減二囚死

五年下教曰當此寒節吾民觸禁抵法繫累凍獄食
不充腸予庸矜惻令該曹造給襦衣具給薪炭又命
諭諸道遍給諸囚俾免凍死之患謂承旨曰屢下恤
刑之教而中外臣僚不克奉行閫帥守令等濫用刑
杖非罪殞身者比比有之不勝驚駭人命至重雖犯
大辟猶且二再三覆議不忍遽斷况以一時之怒過用
不當用之刑致人於死則其在國法豈不寒心傳諭
八方無令恣意用刑知朝家欽恤之意

上遣中官於逆家搜探文書而來朝士簡札及閫帥
守令書信多入之並留中不下後進臣以為言上即
荅以無可觀已焚之盖慮獄事之濫也

補上親鞫自點之獄罪人有將施烙刑者領議政鄭
太和奏曰炮烙者紂之淫刑後世人君無以此施人
者惟我國於治逆時用之然終非人君所宜臨視者
也上為之動容八內以避之

補宋時烈與完南君李厚源書曰龍妻之行凶
孰與淮南之謀叛二害之不與謀無異鳳桂之
無故朱子於淮南尚譏徙蜀而致死則通之與

蜀雖有遠近之殊而其徙其霧露之毒一也以
朱子之論揆之則龍妻猶不可徙况二善乎至
於慈殿之誓君父之誓云云又有所不然者彼
罪雖萬萬可誅自慈殿言之欲全之者是天理
人情之不能已者苟慈殿之道理如此則承順
之者是主上道理主上道理如此則將順之者
是廷臣道理豈有慈殿與主上欲行至善之道
而臣子乃以下層道理爭之哉世皆以瞽殺陶
執為今日斷案曰臣子守法理當如是云此又
有說柴世宗之父殺人世宗處得好亦有朱子

定論試取而看之則臣子為君父私恩而屈者
非屈也乃所以伸其理義也

補脩局啓曰內外刑獄淹滯甚多鎖繫囹圄籲呼
無路炎蒸外鑠癘疫內熾一日辛苦可抵十年四
裔投配之類必多冤枉之人亟令該府該曹該道
諸臣酌其情犯叅以公議速加疏決務存欽恤使
好生之德洽于民心此亦弭災之一道也其他詞
訟之抱屈者隣族之被侵者枯骨徵布者襁裸責
役者敗船水卒之藏魚腹而妻孥收繫者遐遠窮
民之被威奪而鬱抑未伸者亦使所司速為查處

近自輦轂遠至海隅俾無匹夫匹婦之失所則天心可回災害可消耳

八年唐津人李挺之誣告也雪寒方酷湖右士民被逮者多是凍餒之氓上一見供辭洞辭曲直命誅告者盡釋誣枉令有司衣其寒者人給行糧囚皆感祝涕泣而歸

補李敬輿上劄曰殿下總令有司審理冤獄而天心不應災異猶昔者此徒有疏釋之名而無理冤之實也願令大臣及禁府刑部諸臣錄囚徒曾于榻前僉諸罪名輕重及內外遠近逐名覈閱承旨

讀奏諸臣讞議如啓覆之例詳覆文案如情有可
恕法有可出者雖積年久囚久未原決者亦無諉
於罪名甚重必考情得實快施大需則人心可慰
冤氣可消也且近年以來法意寢壞懲惡之典太
過而好生之仁未孚至如盛夏殺人有司奉命而
不爭殿下勾斷而無疑凡公卿三覆君不舉樂者
先王美意恐自今日墜矣昔漢法至嚴亦未聞以
春夏論囚當死之囚雖無可惜軀天之道恐不如
是也

(補) 九年刑曹杖斃擊錚罪人承旨趙復陽請惟覈官

吏曰我國擊錚即古登聞鼓之意囚禁刑訊本非古制子牙遭父兄之患小民被豪勢之侵不有此路何所控告過用嚴刑先斃杖下遐遠殘氓抱冤徑死誠可矜惻

(補)顯宗元年校理趙復陽疏曰刑者補治之末獄者天下之命自古治世寧有刑獄不平者乎今之紀綱之不振法令之不行良由於施措之不得其道論者不察以為威武不足之故遂欲嚴法而峻刑其亦不仁甚矣

(補)金錫胄劄曰竊念自祖宗朝士大夫被逮金吾

者雖係贓污未嘗嚴刑其深仁厚意固自有在伏見近日罪囚情節稍緊輒下嚴刑之教析楊之下血肉浪藉夫重典止辟豈不一快而三百年仁厚待下之風亦自今替矣

五年上念久囚寒凍命給口糧襦衣審理冤獄親閱罪籍悉覈其輕重恐有一夫之抱枉一閱文案久而不忘當讞議刑官所遺忘者輒記之

補七年幸溫泉命中官金以秋入京取御藥以來以秋使人持而先行渠則追後緩行上怒命杖三十棍而使監視承旨金萬基施杖于單禪上蓋矜憐天疾

仁意藹然聞者感歎

補上嘗送清使于西郊出立階石揖送之清使既發軍卒傳語者將告本兵竭蹶疾走之際誤觸至尊幾至顛仆左右侍者無不失色請依律治之上笑曰無情也無可深治命本兵決棍五六度

八年海西人有上變者一問知其誣誅其人放其逮者七十餘人賜糧歸之家財之見攘於吏卒者悉推還之

十一年當覆苑囚大臣以都中痘疫方熾有妨引接外臣請停下教曰嗚呼天性人皆有之而不復其初

以至為惡不卽處斷又從而嚴之罪雖當誅其情惻
戚矣言念及此不覺慘然今歲以此不行明年又以
此不行則彼罪人皆為囹圄之塊而後已豈非為國
之道也不許

補肅宗五年江都匿名書獄事時欲加周杻之刑李
元禎力爭曰鞠獄自有祖宗定制而韓上黨明澮弼
設烙刑至今流毒今何可又創新法遂不得行

補六年右議政閔鼎重請於會盟祭舉動時許捧上
言預為分付使遠近抱枉者皆得陳訴以慰民情上

從之

城內無捧上言之規而以更化
之初抱冤者多大臣建請行之

九年教曰下車泣辜即聖王之盛德寡昧涼德不能
化民以致罪人之斯多予甚恥之今茲蕩滌之典實
出於開其自新之路以示恤刑之意而惟彼愚氓不
體朝家之德意猶不悛惡故犯邦憲則勿論輕重斷
不饒貸

補上見刑曹囚徒多至百餘人命該曹赴即疏決又
下教曰近日刑曹時囚受刑者罪名雖重未過三次
相繼殞斃者至於八九人此豈恤刑之道乎當該堂
卽推考

補十一年傳曰今觀刑曹囚徒在囚罪人至於百名

之多此與古人灑掃洗滌給食給衣小罪即時決遣之意大有乖焉不可無恤刑之道令各該司趨即疏決俾無苦熱滯囚之弊

補十三年江界府使李孝源濫杖殺人下教嚴飭中外

十八年諭八道方伯曰重莫重於人命死不可以復生是以雖以人主挾雷霆之威操生殺人柄者凡於刑人殺人不敢循喜怒之私其生其死一付公議今夫殺人僞印必誅之罪難貸之惡而猶尚會集卿宰再三詳覈引律擬罪求生必死情罪俱無可恕而諸

大夫皆曰可殺然後殺之者豈非人命至重不如是
恐或有挹冤枉死以傷和氣也歟大小州縣之官罔
念欽恤之道決法多不如法或因纖芥之嫌或觸一
時之怒別用大杖恣意撲殺輕視人命不啻草芥昨
觀歲抄諸道守令之犯此而獲譴者亦非一二故如
此之類一不牽復俾知有所懲戢而不可無別樣申
飭之道咨爾方伯領以此意曉諭列邑各自惕念期
革弊習而凡為字牧者不驕明教違法濫刑猶夫前
日而隨事發見則當繩以重律斷不饒貸卿其著案
舉行

補二十年領議政南九萬劄曰古之治獄親與老
貴者有不忍加以拷掠之刑者則以衆證定其罪
乃是法例也閔黯自禁府既以判付取供不服矣
若欲取服則亦當加以刑訊毋論國朝遠事近若
許積為堅之父吳始壽假托異國之言誣及先王
者猶不加刑訊則今黯之所坐未必有加於彼二
人况其事之明白出於聖明親見其札則亦不待
衆證而可定者乎

補二十三年親禱社壇還駕臨義禁府前路駐輦街
上召承旨史官及大臣禁府刑曹堂上以憫旱恤民

之意縷縷下教仍命禁府典獄捕盜廳及外方時囚
罪人並為放釋命召禁府典獄囚人六十餘名悉詣
駕前諭之曰今此駐輦行赦實出遇灾憂民不得已
之舉非以汝為無罪也汝輩各自警飭勿復犯罪若
或再犯更不汝釋也罪人多有感泣者上見罪人蓬
頭鬼形蹣跚顛倒惻然曰天之生民厥初何異而此
屬陷罪久囚皆成鬼形大禹之泣辜信然矣

補二十五年上覽海州安姓女人擊錚爰辭命拿問
牧使李翊周查究濫刑殺人狀時官吏或多用濫刑
往往濫殺人命故有是命

補因日寒上欲錄囚命取入囚徒案逵臣許墀啓曰
囚徒案不過列書姓名只註畧節罪目而已至如重
囚則似難只憑囚徒案而輕議也古者人君視錄囚
之規必不如今啓覆之為也蓋啓覆皆以一罪旣已
勘律之後始行啓覆自上雖有特令分揀者而終不
免為法外之施凡重囚之類初行推問文案旣有依
例請刑一番施刑之後則不復考見文案循例如刑
而已故其間雖有情罪之可疑者而無由自暴一年
二年掩滯牢狴終於飢凍瘦斃而止若是者豈不感
傷天心乎若詳其已成之文案叅其情罪之輕重則

雖殺戮重囚必不無罪疑惟輕之類矣今觀刑曹囚徒案則或以疑獄或以咀呪或以強盜其他罪名甚重者其數亦多而經年閱歲處決無期舊者積滯新者繼入此實有司之過也今若使刑曹堂上時囚之未及畢究者趁即推覈畢推而文案已有者勿論已啓聞未啓聞一一參考文案至於罪重而情輕者罪疑而宜輕者則參酌情罪論列所見與脩局諸宰商確議定然後登對時仰稟自上參商情罪或施特恩則此誠古昔人君視錄囚之意而今日聖上惻怛欽恤之意不徒歸於區區輕囚之議放也

二十七年久旱下教曰昔漢明帝以楚獄多濫夜起
彷徨親詣洛陽獄多所決遣誠千古之美事今金吾
囚者至於八十餘人之多囹圄狹隘露處者多幽鬱
之氣豈不上干天和而召災沴乎遂於社壇親禱訖
還御義禁府虎頭閣與大臣禁堂政院三司而慮囚
分輕重酌處出獄者四十餘人

三十三年下教曰昔宋太祖嘗乘快誤決一事終日
不樂予曾於戊辰因一喜怒妄殺奉憲之吏痛自悔
責心常不忘豈特一事誤決終日不樂而已乎雖至
賤人命至重所奉者法而駢首殞命惻然之心久而

未已其令該曹憲吏妻與子優給米布噫以人主之尊殺一無辜而悔責至此况他人乎仍飭中外官吏無敢以喜怒濫刑殺人克體欽恤之意

補右議政李愼命啓曰典獄地勢卑下潦水時罪囚不免濕處生病曾前鋪板數間之外若得繕工引鋪板四五十立可以盡鋪云其在恤囚之道不可不給並以此分付各衙門施行何如荅曰允

三十四年下教曰人命至重雖大辟應死之人必有詳覈之舉祖宗朝設法之意豈偶然哉惟其如是故刑杖訊杖笞杖之制莫不各有大小輕重之別為官

吏者導守而不敢違如或有違法致殞人命則必繩以重律祖宗之法若是其嚴故枉死者少矣屢經兵亂法制墜紊苟有官威者恣意濫用乃敢以刑杖為飾怒之具務大其杖無復顧忌邇遠僻絕之處此習尤甚抱冤無告殞命者何限傷和氣積怨讟莫甚於此前者累度申飭俾無冤濫之弊而朝綱不振人莫嚴憚舊習猶存良可寒心盛暑隆寒尤當軫恤凡笞杖用刑各令遵式毋得過濫非軍律則切勿用棍獄訟亦無久滯各邑各鎮如有違犯朝令不勤奉行者啓聞科罪

景帝元年冬夏遣近侍審獄放輕囚宮牆因雨頽圯
民有闌入者法當死以其無情特原之刑隸乘醉裂
破書啓該曹據邀截公文律蔽以死又特令此律減
死

英宗元年除壓膝法下教曰漢明帝觀明堂圖以為
人之臟係於背特除笞背之法以我朝言之世宗亦
除之此盛德事也壓膝之法無於律文雖律文所載
若其已甚者亦可除去况無於律文者乎刑問之法
亦非古者五刑之屬而此則大明律所載也至於壓
膝終非人主慎刑之意此後則依除笞背法之例永

除壓膝之法

久旱親禱社壇歷臨義禁府虎頭閣疏釋罪囚下教
曰方以憫旱之意欲為疏決豈以刑殺之地有所拘
碍乎且錄囚自有先朝已行之規雜犯死罪以下並
放之

補脩邊司啓言司饔院御兇燔造柴山潛斫人論以
盜園陵樹木律上判曰此有張釋之之定論斟酌改
定可也刑曹覆奏諸道強盜罪上教曰好生惡死人
孰無是心而迫飢寒困侵漁不自覺其陷溺至此此
皆予教化不行而然也按事之臣宜體曾子哀矜勿

喜之文酌量過決毋令久滯囹圄也仍命頒飭八道
兩都

補二年教曰向者大臣以李善行擇送善地為言予
善其言而從之矣凡竄配罪人乃是欲生之意而近
來金吾配所一任其好惡極為寒心自今以後特教
外若擇送惡地則金吾堂上不免反咥之律奉承傳
施行

補六月教曰秋曹有近四十年之囚案寧有如此事
也昨講宋鑑太祖遣使洗獄而恤囚此亦仁厚之道
也近日染氣熾盛獄囚之可疑者必加審慎毋致多

年滯四分遣郎官使之詳覈以處

補平安道定配罪人睦天任遭親喪義禁府防啓
歸葬上曰王者治天下無他存也載法典之歸葬
如是防塞豈不為已甚乎甚令歸葬

補清州偷盜罪人八名連斃獄中下教曰彼盜賊豈
樂為之哉困飢寒困良彼為是逃生之計寃厥所由
罔非寡躬之咎既使之陷於惡又從而治之予每見
狀啓未常不慘然也其飭諸道監司討捕使

補三年判義禁吳命恒奏鞫獄緣坐之人方定配所
而母子兄弟分散配各處相去絕遠雖此輩不無可矜

取考本府謄錄則或為奴一邑或編配隣邑至若官婢之孳蓄而入於緣坐者定屬遠地則失所餓餒無寧還屬本邑仍為使役似或合宜從之

補十二年大臣言編配遭父母喪者許令歸葬法無其文上曰王者以孝為治如之何其不歸葬也可令歸葬

補四年儒臣鄭羽良言逆賊麟佐子年五歲能作劍舞狀若不早為之圖則不無後慮囚之獄待年殺之宜矣上曰法一低昂奈後弊何囚獄待年非王法也國朝仁厚之風壞矣

補七年上親臨鞠囚謂問郎曰故相李景奭謂其子孫曰若輩為問郎只隨罪人言勿先有意於鉤引此言宜有後也予於親鞠時見之其不迷亂者幾希問郎若有意鉤引其害尤何如也

補上親臨䟽決乃教曰王者慎恤非刑而何金吾秋曹抄入將至數千而䟽決不過百餘心甚矜惻咨甫司寇之臣今茲付標以下者逐日赴坐速即稟處亦令外方趨即䟽釋

補八年命除捕廳剪刀周牢之刑造臣有言剪刀周牢甚酷若施此刑則雖冤枉者未有不誣服上立命

革罷

九年除烙刑下教曰自古制刑俱有其法若其法外
雖快取服終欠恤刑故昔雖有之亦甚罕用此可以
仰體列聖朝盛意矣往者乙巳旣除壓膝昨年因原
任陳達捕廳剪周牢之刑嚴飭除之即今所餘者惟
烙刑而至於鞫囚之極甚凶惡者亦無其效徒欠王
政肉刑笞背俱有古例而漢文唐宗皆除之况法外
者乎依壓膝例永除

補上覽寶鑑中世宗朝飭諭刑官之文歎曰至矣盡
矣予敢不述咨爾承宣書此教鑄揭本曹壁上仍命

釋輕囚掃圜罪人凍餒者審察以聞

補十一年下教曰獄者所以懲有罪本非致人於死而祁寒盛暑凍餓疾病間有非命致死其令中外官吏淨掃圜療治疾病無家人護養者官給衣糧如有懈緩不奉行者嚴加糾理

補十四年命秋曹更鑄杖穴頒于八道時京外刑杖多違式教曰近來外方用刑之濫酷案為痼弊殺一不辜取天下孟子非之人君尚如此况方伯守令乎刑者不可復續死者不可復生而官長因其血氣之怒不念人命之重欲立威濫殺慎刑之義豈如是乎

訊杖大小自有定限一依杖穴無敢違越又飭士大夫家私自施刑

十六年下教曰漢文旣去肉刑丘濬所謂人得全其身不絕其類者文帝之德是也然於此有起感者何則漢文之朝肉刑有三而旣去之則大辟之外更無肉刑漢武之時司馬遷猶被其刑馬端臨所謂復用者也漢文旣去漢武復用豈非龜鑑乎噫我國仁厚相承即無此等之刑但壓膝烙刑豈可比諸肉刑而其猶惻傷並命去之蓋在上者其欲快意一時在下者或因此勸君文帝去之者武帝復用焉知無耶噫

法之不可無者刑既去之刑其或復用此猶不足將
復有肉刑可不惕哉可不察哉以此分付金吾作卷
承傳永為後世之鑑

除刺字法下教曰近來亦有黥法乎曾見狀聞有刺
字之說矣俞拓基曰我國專用明律而明律有竊盜
者刺字之文故京外照律雖有其文而實無刺字之
事上曰御史暗行時見之或有黥竊盜者乎李彞章
曰以臣所聞見無受刺之類矣上曰無此則可謂無
肉刑矣既無其法而徒用於文狀者已無義意後世
安知無因文索用之弊乎此後則永不用此等文狀之

意分付可也

補教曰頃者以用刺律事下問而其時文雖引用今無是事云故只令除去其文矣今因講而丘濬之按可謂切至又聞領事所達於法曹果有黥刺之具而行之云若此漢典肉刑猶在於今不黥其面而刺其臂身體髮膚聖訓所載自上至下於貴於賤矣異哉一有所傷終身不祛豈不慘惻面臂又何間該掌承旨馳往該曹取其具而付丙京司若此外方可知諸道所在者分付道臣亦為收聚付丙違令復用者重繩以勅且丘濬所按法外之刑請以禁止者亦切實

治捕周牢無異夾棍其他法外之刑其亦不一瑣者
雖不提諭即令備局條列嚴禁徃者訊穴申飭之時
猶漏有律典所圖者非特訊杖一例申飭京外噫後
漢孔融之斲朝涉之脛謂為無道為牧之地各刑一
人之議令人感動儒臣因文義所陳浚民膏血云者
其亦切至嗚呼紂之無道浚民膏血刑之殘酷斲涉
之脛曰今治民之官其不能擇浚吾民之膏血曰今
治盜之臣亦不能擇濫刑無辜之元元孔融所謂豈
不遠乎其不能擇在於銓曹其不能勅在於其君噫
使三百六十州之民嗷嗷於浚血之中嗟嗟於酷刑

之濫則是非特守令營將之過即予之過民豈不怨乎上乎咨兩銓之臣諸道之臣體此怵然動心之意為官擇人嚴飭列邑予亦他日遣御史時詳為廉問其或違令自官高而繩法不貸其體其體

補十六年又傳曰孔子曰今之聽訟者求所以殺之古人之聽獄者求所以生之丘濬註曰聽獄者當於殺之中而求其生求其生而不可得然後殺之有可生之路而請以讞焉罪疑從輕可也不疑然後殺之此正上下之龜鑑而亦不無因此諭者所謂求其生者由於哀矜惻怛之意恤之審之詳以察之者非假

借區區之仁也。今之為官者，初不審察何可以戒其
宥乎？所謂不疑，然後殺之者，欽恤之心存諸中而詳
慎之意勤於外。此可疑不疑，灼然乎治囚之際，故其
其欽恤詳慎之心，初無其疑。又何不疑吁？嗟小民其
能措手乎？咨諸道道臣，體予臨講興感之意，其欽其
恤，申飭列邑。

補十七年教曰：凡法令之飭，宜自上行之法。杖笞杖
各有其式，而孔棍即是軍中用者。即位之後，既除二
過重之刑，而於軍務外用棍，非盜亂杖。近來亦禁矣。
金吾郎外方出使者，其或不謹，輕重間自有當律假。

都事雖曰武臣其名亦禁郎豈可異哉而戊申帳殿
殿座時即中外戒嚴之時其假都事為賊被逐而來
故執法之臣請以梟示而十分叅酌帳殿決棍而凡
事一創之後每乎手熟況在上者乎故於頃年因憤
痛之在心駭禁郎之遲滯或施決棍此非舊例嗣後
之君非比此時而遵此法而非軍務而為此惟允之
臣以此教執奏噫自諭其過若是申飭之後有司之
臣於非盜亂杖軍務外用棍惟意行之則可曰承教
其曰有嚴其隨聞奏達在於大官聞風糾正惟在耳
目而私門用杖規警亦在耳目噫在於規警之職身

自犯之其誰欺乎外方法外之杖曾已申飭而其遵
行否另飭諸道

補右議政俞拓基筵啓以宋之詔獄之法觀之一國
本無二獄而我國則有禁府與典獄此雖出於分貴
賤之意而既稍違於古矣况以文王之尊猶罔兼于
庶獄而我國則諸上司及兵曹漢城府掌隸院司憲
府各自直囚有弊甚多典獄囚徒每十日一示于右
相例也臣見之則舉多以私喜怒囚人故臣於錄囚
時使之放送則又多於其翌日旋即囚之云此弊誠
不可不嚴禁此後又或以私事囚禁則大者啓達論

責小者自外推治何如從之

補又因俞拓基所奏命續成典錄通考仍諭之曰刑
業中興之君尚寬大故國祚綿遠繼體守成之君務
苛刻故子孫促亡輯是書者不可不知也

二十年下教曰勉飭恤刑意豈淺哉皇朝律文纖悉
脩矣我朝又有大典受教之律奉承傳者是不過二
時飭勵而徒年以上仍以為律律官旁照輒稱受教
律益繁而法又細心常悶焉聚諸受教只以應為奉
承傳者釐正抄錄則非徒幸於吾民其有光於聖德
仰體乎欽恤於此脩矣且嗣服以後刑罰過中其餘

者多官負之非軍務而受棍下吏之非軍務而治棍
非強盜而用杖亦皆除之事雖微矣亦恤刑之一端
其令脩局雖不設廳仍本司差堂差郎舉行

二十二年下教曰昔唐太宗凡於決囚必齊居焉其
意義也然豈教於此欽哉欽哉惟刑之恤尚書所云
欽恤盛德亦我朝家法噫刑者國之所重每當慮囚
得一人之生心常喜焉又教曰頃者觀豐閣下教若
何而其時重囚因此決放者多矣今聞輪對官所達
輕囚至於四十餘名其涉寒心噫甘霈方下高高蒼
穹為我元元之時其在王者體乾行仁之道若無疏

釋之舉亦豈恤刑之道乎其中輕囚即為放送不可不推問處決者亦即舉行俾無滯囚之弊

補續大典 顛狂失性殺人者減死定配 明火賊登時打殺者外不告官擅殺依法抵罪 赦令凡係徒年則勿論輕重皆放

補二十三年下教曰刑不上大夫朝侍從於鷄班夕決杖於圜圉非重侍從之意此後曾經侍從者關係贓污外公罪照律杖則收贖此亦呂刑金作贖刑之意也

補三十一年教曰苟非罪如藿顯者誅及婦人其宜

審慎自今逆賊妻勿為正刑雜職兩班以上雖犯殺人而正法勿為檢屍

三十二年下教曰昨今為慈聖飾喜之舉竊罕往牒而吁嗟節屋之民囹圄之人亦知此道乎思之及此若恫在己金吾時推中關係御史書啓者外一併放送徒年之流亦為蕩滌以示予奉東朝同慶之意又下教曰書云欽哉欽哉惟刑之恤哉顧不重也而今於寶鑑飭臬司之教至矣盡矣此亦當法祖宗者也噫昔之唐宗不過借仁囹圄鵲巢今予涼德莫致有恥且格之效囹圄充滿食息靡甘寶鑑中四境之內

皆吾榻側之教不覺三復而欽誦猗歟盛哉況值今
歲尤宜欽恤其令金吾秋堂持囚徒八侍以奏

三十五年下教曰昔年有永嘉縣事御製故心常欽
歎每於此等不憚其憊首尾親問意在欲辨黑白今
於玄昶雖施寬典其初承款由於刑訊此所謂拊楊
之下何求不得者也不覺瞿然吁嗟諸道之臣體予
瞿然之意凡於審囚十分欽恤營將治盜窮酷特甚
故稱亂杖曾雖申飭至於周牢亂杖十分無疑然後
乃推俾無無辜之民枉罹之弊事下諭于八道兩都
四十六年下教曰今因編輯堂上李最中所奏不覺

感歎壓烙之刑予皆次第除之而以朱杖撞之雖非
壓烙之比其酷滋甚此非律文而隨事輒施隨意其
連何謂連也至於壓烙設器具然後乃施而此則因
一時之令衆杖齊撞其若致命何異亂殺此後雖有
命執法之臣爭勿施行執法之臣若有恟而勉承者
耳目之官隨事糾劾事載於脩考亦於金吾大書付
諸噫彼漢文唐宗漢唐中主而聞一善則不惜數百
之金與數百之匹况錫馬乎此非他之比有賞然後
可表其直行副司直李最中特賜熟馬一匹於殿庭
使國人知予意焉

教曰子曰導之以政齊之以刑民免而無恥周有五
刑而漢文除肉刑見明堂圖而唐宗除笞背至於亂
問五刑所無漢唐以後亦無而不過我國治盜者取
快而然也以近年剪周牢觀之可知噫雖於治逆先
除壓膝次除烙刑因重臣所奏朱杖撞問亦禁此猶
若此況亂杖乎既有周牢一條自可嚴禁何必斷人
足指然後法立歟張子西銘豈不云乎民吾同胞物
吾與也雖下賤形骸一也既全而生之其欲全而歸
之常情也其雖無狀者刑則酷矣况玉石不辨之地
無辜之民罹此刑傷此體者其幾人興惟及此此心

對耐噫四十六年臨御無一仁政今於暮年欲除歷代所無之刑而亦非大典續典所有之刑也臨門詢問僉議大同嗚呼于今七十七歲其欲為海東之人全其軀此與去壓膝烙刑之意同也自今日京外亂杖之刑一切除之使吾民全而見其親

又教曰尚書曰欽哉欽哉惟刑之恤哉漢文亦云刑者不可復續壓烙二刑既除之而其後雖下教編輯宜載其中而頃者下教亦皆詳脩此後雖關係鞫囚治盜之刑切勿復用莫云此不過付諸捕將其流之弊可勝言哉且雖非鞫囚頃者李夏濟事豈闕治

盜尚今悔之况京外用此刑者快其手輕先用之者多
古將李浣見鴉取鷄卵試以杖奴及其承款有深戒
之言曾雖申飭非強竊而用亂周之刑內而耳目糾
繩外而道臣隨聞使吾無辜之民勿陷焉

續傳曰噫幾十年臨御無一仁政頃者受叅亦是萬
萬料表而便是初政故即席以思雖減選武布此不
過一小政今朝目沙石八襪憶唐宗之見明堂圖除
笞背召大臣脩堂侍從諸臣詢問噫此刑漢唐以後
所無其於我國亦莫知何年竊行而大抵名不正其
刑甚酷予嘗一欲除之猶默于今沙石之八襪無異

醒予且五刑卽周之制而穆王耄荒之年其猶金作
贖刑漢文其亦見圜圖書諭能除肉刑今者此刑何
異劓剕之刑殘酷則尤甚既已下詢而僉議偶然詢
同能除於暮年之中卽此以後大辟之外人庶有全
其四肢中一也亦豈曰偶然也哉然此諸與土同價
之說其猶歟然曰禁其奢不過紋緞其緞自若曰禁
酷刑亦不過禁亂問而周牢自若是予歟然者而前
者只禁紋緞意為象譯今者其除亂問恐法蕩然雖
若此究其本則苟且也此亦為國事故有下問者左
右捕將皆令入侍左右廳亦有捕捉者云故問之右

廳果強竊而左廳不過穿窬其絲胎竹筐初為窮儒物件其中有可駭者禁紋緞之時綾屬欲禁而其時有奏曰至於綾屬士夫家曰以巫服不著云而故不禁近者思之粗粗布勝無裳古詩既云雖無其紋勝於紬屬此屬曾予深惡者故燕賀追禁物件中有此名違禁可知事雖微細若是自現此亦乾道之昭昭綾緞之屬該廳推尋時此乃違禁見偷勿問因此慨然者絲胎竹筐自訴該廳者而其欲索焉若無今日之禁於前此亦施威者若此而民何措手足且孟嘗食客之拘盜亦亂問乎以此觀之今日下教亦可謂

不先不後庶可見暮年除弊矣私門刑訊其已禁也
况除亂問乎此後若有違令私門亂問者其果亂民
也法曹察奏耳目規覈使暮年其君禁令乃行焉犯
者有職名者限已身禁錮有士名者不齒士類事一
體嚴飭雖周牢之刑非不可不者則嚴禁亂施焉

續四十九年懸申聞鼓於建明門令民抱冤者擊鼓

以聞

太宗朝事
見刑制

續今上二年傳曰昨冬欽恤典則之頒卽欲修先王
之舊典而恤小民之枉受也近來朝令在下者每多
泛視故特遣宣傳官抽柱摘奸者此也今覽書啓雖

小邑殘鎮多即厘正而至於嶺管藩閫也萊府邊門也初不致意非但尺度舛誤亦不刻誌此豈宣化承教惟恐不及之義乎可謂駭然之甚者慶尙前監司李性源東萊前府使林鼎遠為先罷職其餘大丘尙州忠州茅鎮營其所故犯亦如嶺管萊府俱皆不準式不刻誌渠以么磨武弁安敢不奉朝令至於此甚况職在治盜恣意用棍尤涉痛駭當該營將一併削職此皆柱邑中現發者又若此外守令為念迎送姑不下教如有未及釐正處即為修正俾勿犯科事自脩局更為嚴飭諸道

續大典通編 時囚每五日錄啓 無論親鞫庭鞫

值大雨劇暑則設草茆假家於訊推處

東國文獻備考卷之一百四十六



